



Kommuneqarfik Sermersooq
Kuussuaq 2
Postboks 1005
3900 Nuuk

29. december 2017

Nal. nr./j.nr.: 2017-320-0002

All. nr./brevnr.: 52685

Sull./sagsbeh.: FH/jh

Uunga: Kommunaldirektør Lars Møller-Sørensen

PINEQARTUT KIKKUUSSUSIINIK
ILISARNARUNNAARSAANEQ

Kommuneqarfik Sermersuup A-mik suliamut atatillugu assuarinninnera

Kommuneqarfik Sermersuup A-mik suliamut atatillugu 6. oktober 2016-imi assuarinnissimaneranik eqqartuussissuserisup E-p, G, A-mut sinniisuusiq sinnerlugu naammagittaalliuutaa e-mailikkut 26. januar 2017-imeersukkut ilanngussartalikkut tiguara.

A Kommuneqarfik Sermersuumi atuarfinnut siunnersortitut atorfeqartitaa-voq, assuarineqarsimallunilu Danmarkimi atuartitsinermut ministerip Kalaallit Nunaanni atuarfinnut arlalinnut pulaarniarnera pillugu oqaaseqaammik KNR-ip nittartagaani allataqarsimanera pissutigalugu. Oqaaseqaat kommunip atuarfiinik isornartorsiuisuuvoq.

Naammagittaalliuut tunngavigalugu aalajangerpunga suliamik misissuineq aallartinniarlugu. Misissuina massakut naammassivara.

Uunga paasinninnera unaavoq A-p oqaaseqaataa inatsisinik unioqqutitsi-suunngitsoq, Kommuneqarfik Sermersuumi atuarfinnut siunnersortitut kif-faanngissuseqarluni oqaaseqaateqarsinnaatitaaneranut killissarititaasut ilu-anniinnera erseqqissoq. Taamaalilluni oqaaseqaat taanna immi assuarin-ninnermut tunngaviusinnaangilaq.

Kommuneqarfik Sermersooq A-p taassuma oqaaseqaataata kingunerisassai tunngavigalugit assuarinissaanut aammattaaq tunngavissaqaanngilaq.

Taamaattumik Kommuneqarfik Sermersuup A oqaaseqaatip nassatarisaatut assuarisinnaanngilaa.

Aammattaaq isumaqarpunga Kommuneqarfik Sermersuup assuarinninnermi malittarisassanik A-p kommunimi atorfeqartitaasutut kiffaanngissuseqarluni oqaaseqaateqarsinnaatitaaneranut ataatsimut atuuttunik kukkusorujussuarmik paasinnissimaneq takutikkaa.

Kommuneqarfik Sermersuup uannut oqaaseqaataa aallaavigalugu suliaq imatut paasivara kommunip isumaa malillugu A-p oqaaseqaataata ilusiler-sorluagaannginnera kommunip suliamik suliarinninneranut sunnuteqarsimasoq. Uanga paasinninnera unaavoq tamatuma manna ilungersunartumik nalorninarsisikkaa, tassalu kommunip suliaq suliamut inatsiseqartitsinikkut sinaakkutaasoq killissaliissutillu suut pisortani atorfeqartitaasut kiffanngissuseqarlutik oqaaseqaateqarsinnaatitaanerannut ataatsimut atuunnerat ilumut eqqortumik paasillugit suliarisimaneraa.

Ataatsimut isiginnillunga isumaqarpunga Kommuneqarfik Sermersuup suliaq malittarisassanik pisortani atorfeqartitaasut kiffaanngissuseqarlutik oqaaseqaateqarsinnaatitaanerannut atuuttunik unioqqutitsilluni suliarisimagaa.

Tamanna isorisarialerujussuurtut isigaara.

Inassuteqaatigaara suliaq A-mut tunngasoq Kommuneqarfik Sermersuup oqaaseqaatikka isiginiarlugit suliareqqissagaa.

Kommuneqarfik Sermersooq qinnuigaara suliami susoqaqqinnersoq uannut nalunaarutigeqqullugu.

Suliami annertunerusumik kukkussuteqartoqarsimasoq isumaqarama Inatsisartut Inatsisinut Ataatsimiititaliaat aamma Kommuneqarfik Sermersuumi

kommunalbestyrelsi Ombudsmandi pillugu inatsimmi § 23 tunngavigalugu tamatuminnga nalunaarfigaakka.

Oqaaseqaat manna oqaaseqaammi pineqartut kikkuussusii ilisarnarunnaar-sillugit nittartakkakut tamanut saqqummiukkumaarpara, 2017-imilu ukiu-moortumik nalunaarutinni ilanngukkumaarlugu.

Tamatuma kingornatigut imaattumik oqaaseqaateqarpunga:

1. Suliap tunuliaqutaa

Danmarkimi atuartitsinermit ministerip Nuummi Sisimiunilu atuarfinnut ar-lalinnut, matumani Atuarfik Samuel Kleinschmidt ilanngullugu eqqarsaatiga-lugu, pulaarniarloq KNR-ip nittartagaani 30. august 2016-imi saqqummiun-neqarpoq.

Nittartakkamik atuisut allaaserisaq pillugu oqaaseqaatitik KNR-ip nittarta-gaani toqqaannartumik allassinnaavaat. A-p Kommuneqarfik Sermersuumi atuarfinnut siunnersortitut tjenestemanditut atorfeqartitaasup oqaaseqaat i-maattoq 30. august 2016-imi allappaa:

”Man henfalder i mild undren over visdommen i, at man vælger at fremvise en af landets ældste og lavest scorende folkeskoler for den danske undervisningsminister?

Er der tale om et departementalt freudiansk slip og underbevist ønske om, få Danmark til at tage uddannelsesområdet tilbage af humanitære årsager. [Efterfulgt af smiley; min be-mærkning]”

”Nunami maani atuarfiit pisoqaanersaasa angusakinnerpaaffiusartullu ilaata Danmarkimi atuartitsinermit ministerimut takutissorneqartussatut toqqarneqarnerata silatorpalaassu-sia tupigilaanngitsuugassaannngila?

Naalackersuisoqarfiup ”freudiansk slip”-enera pissutigalugu ilinniartitsinermit tunngasut Danmarkimut uterteqqinneqarnissaannik sianiginngisamik kissaateqarneq pineqarpa? [Smiley naggasiullugu; uanga ilanngussara]” (Atorfeqarfimmi nutsigaavoq)

Kommuneqarfik Sermersuup A oqaaseqaateqarnera pissutigalugu suliamut atatillugu oqaloqatigineqarnissaanut aggeqquaa, oqaloqatigiinnerlu taanna 9. september 2016-imi ingerlanneqarpoq.

Kommuneqarfik Sermersuup A 6. oktober 2016-imi imaattunik imaqartumik suliamut atatillugu assuaraa:

"Suliamut atatillugu assuarinnineq

Piffissap suliffiusup iluani KNR-ip nittartagaatigut oqaaseqaateqarsimavutit, tassanilu Danmarkimi atuartitsinermut ministerip Ilinniartitaanermullu Naalakkersuisup ASK-imut pullaarniarnerat pillugu oqaaseqaateqarputit, tamatumalu allat qularnaalluinnartumik isumaqalersissinnaallugit suliannut ilaatillugu oqaaseqaateqarsimasutit.

Atuarfitta ilaat pillugu tamanut ammasumik oqaaseqaateqarnerit atuarfiullu pitsaassuseqarnera pillugu oqalliserinninnerit akuerineqarsinnaanngilaq. Suliaq tamanna kommunip nammineq iluani pisariaqarpoq. Atuarfimmi sulisut tamanna imminnik suliaminnillu tamanut ammasumik isornartorsiuinertut pissutissaqarluarlutik paasisinnaavaat.

Atuarfitta pitsaassuseqartinneqarnerat oqallisigineqassasoq ingerlatsiviup kissaatigippagu oqallinneq uagut aqussavarput, kiisalu oqalliffimmik, ilusianik aamma piffissamik/sumiiffimmik toqqaanitsinni silatusaarluta pissalluta.

Oqaaseqaatinni tamatuma saniatigut mitallerpalaartorujussuullutillu quiassuarpalaartorujussuuvutit, kiisalu Naalakkersuisoqarfik suleqatitta qaninnerpaat ilaat isertuarnak isornartorsiorlugu.

Sulisup ilittut inissisimasup Naalakkersuisoqarfimmik tamanut ammasumik isornartorsiuinera akuerineqarsinnaanngilaq. Pingaartumillu suliamut atasumik, oqallittarfimmilu tamanut ammasumi taamaaliornerit.

Aammattaaq tjenestemandiuvutit, taamaattumillu tjenestemandit pillugit inatsimmi § 12-imi atorfimmu naapertuuttumik ataqqinassuseqartumik tatiginassuseqartumillu pissusilersortussaananermik piumasaqaat eqqortittussaallugu:

"Malittarisassat atorfimmu atuuttut tjenestemandip peqqusersuilluni malissavai, kiisalu atorfimmu naapertuuttumik ataqqinassuseqarnissamik tatigineqarnissamillu piumasaqaataasunik eqqortitsisinaanini sulinermini sulinermilu avataani takutissallugit."

Naliliivunga pisoq taanna suliamut atatillugu assuarinninnermut tunngaviusoq, siunissami-
lu taamatut pisoqaqqissanngitsaq matumuuna naatsorsuutigalugu.” (Atorfeqarfimmi
nutsigaavoq)

Eqqartuussissuserisoq E assuarinnineq Kommuneqarfik Sermersuup tu-
nuartissagaa angusaqarfiunngitsumik qinnutigereerlugu tamatuma kingor-
natigut 26. januar 2017-imi uannut naammagittaalliorpoq.

Kommuneqarfik Sermersooq allakkatigut 10. februar 2017-imeersutigut ta-
manna tunngavigalugu qinnuigaara suliaq pillugu oqaaseqaateqaqqullugu.
Kommuneqarfik Sermersooq tamatumunnga atatillugu qinnuigaara assua-
rinnineq pisortani atorfeqartitaasut kiffaanngissuseqarlutik oqaaseqaate-
qarsinnaatitaanerit pillugu malittarisassat tunngavigalugit pisimansoq i-
summerfigeqqullugu.

Kommuneqarfik Sermersuup oqaaseqaataa allakkatigut 7. april 2017-imeer-
sutigut tiguara. Assuarinnineq pissutissaqartoq kommunip aalajangiusima-
vaa.

Kommunip oqaaseqaataa eqqartuussissuserisumut E-mut tamatuma kingor-
natigut nassiuppara, taassumalu oqaaseqaatai allakkatigut 18. juni 2017-i-
meersutigut tigullugit.

Suliap ingerlasimanagera oqaaseqaatip naggataani allaaserineqarpoq, suliapi
allagaatinik tassunga attuumassuteqartunik issuaanertalimmik.

2. Misissuinerma killissalersorneqarnera

Uanga paasinninnera unaavoq suliaq matuma isumaliutersuutiginnissaanut
pissutissaqalersitsisoq, tassalu Kommuneqarfik Sermersuup suliamik sulia-
rinninnera pisortani atorfeqartitaasut kiffaanngissuseqarlutik oqaaseqaate-
qarsinnaatitaanerit pillugu malittarisassanut naapertuuttuunersaq.

A-p assuarineqarsimanera eqqarsaatigalugu Kommuneqarfik Sermersuup aamma eqqartuussissuserisup E-p tamatuma saniatigut paasinninnerisa assigiinngissuteqarnerat eqqumaffigaara. Tamanna imatut paasivara assuarinninneq mianersoqqussutitut iluseqarneraq assuarinninnerlu suliassat suliarineqartarnerat pillugu inatsit tunngavigalugu aalajangiinermik oqartarnerat aalajangiinerunersoq isumaqatigiinngissutigineqartoq.

Kommuneqarfik Sermersuup A-p oqaaseqaataa innersuussutigalugu taassuminnga assuarinnissinnaanngitsoq isumaqarlunga aallaqqaasiutitut oqaatigigakku Kommuneqarfik Sermersuup suliassat suliarineqartarnerat pillugu malittarisassat malissimanerai sukumiinerusumik isummerfiginiarnagu aalajangerpunga. Inatsisartut Ombudsmandiat pillugu Inatsisartut inatsisaanni nr. 8-mi, 3. december 2009-meersumi § 14, imm. 1 tamatumani innersuussutigaa, tassuunalu aalajangersarneqarpoq naammagittaalliut misissuineramik aallartitsinermut pissutigissallugu naammannersoq Ombudsmandip aalajangissagaa¹.

Taamaattumik Kommuneqarfik Sermersuup A-mut allagai 6. oktober 2016-imeersut assuarinninnermik tulluuttuni taagaangakkit assuarinninneq mianersoqqussutitut ilumut isigineqartariaqarneraq taannalu suliassat suliarineqartarnerat pillugu inatsimmi aalajangiinermik oqartarneraq tunngavigalugu aalajangiinerunersoq isummerfiginninneq pineqartanngilaq.

Kommuneqarfik Sermersuup kommunip iluani malittarisassat arlallit suliap suliarineqarnerani atugassatut nassiuppai. Malittarisassat taakku pisortani oqartussaasut kiffaanngissuseqarlutik oqaaseqaateqarsinnaatitaanerat pillugu malittarisassat eqqarsaatigalugit qanoq inissisimanersut sukumiinerusumik isummerfiginngilara.

¹ Naammagittaalliut Ombudsmandi pillugu inatsisip nutaap (Inatsisartut Ombudsmandiat pillugu Inatsisartut inatsisaata nr. 7-ip, 1. juni 2017-imeersup) 1. juli 2017-imi atortuulernissaa sioqqullugu suliassanngortinneqarami Ombudsmandi pillugu inatsisitoq 2009-meersoq tunngavigalugu suliarineqassaaq. Tamanna Ombudsmandi pillugu inatsimmi nutaammi § 30, imm. 3-kkut aalajangersarneqarpoq.

3. Pisortani atorfeqartitaasut kiffaangissuseqarlutik oqaaseqaateqarsinnaati-taanerannut inatsiseqartitsinikkut tunngavigisaq

3.1. Malittarisassat pillugit naatsumik takussutissiaq

Pisortani atorfeqartitaasut Tunngaviusumik Inatsimmi § 77-imi aamma Inuit Europami Pisinnaatitaaffii pillugit Isumaqatigiisummi artikel 10-mi aalajangersakkani pineqartunut ilaatinneqarput. Malittarisassat taakku sunniutaat eqqartuussiviit, Folketingip Ombudsmandiata aamma Inatsisartut Ombudsmandiata sulineranni sukumiinerusumik saqqummertarput.

Suliassaqarfimmi tassani Kalaallit Nunaanni inatsiseqartitsinikkut tunngavigisaq aamma Danmarkimi inatsiseqartitsinikkut tunngavigisaq pingaarnerusutigut assigiipput, taamaattumillu Danmarkimi inatsisilerineq pillugu atuakkiat allaaserisallu, Danmarkimi Jusititsministereqarfiup ilitersuusaa aamma Folketingip Ombudsmandiata periaasia suliamik qulaajaaninni ilannguttarpakka.

Oqaatigaara Folketingip Ombudsmandiata pisortani atorfeqartitaasut kiffaangissuseqarlutik oqaaseqaateqarsinnaatitaaneratt pillugu malittarisassanik tunngavinnillu paasinninnera sulianut taakkununga innersuussutinnit ersertutut ilaleriga.

Pisortani atorfeqartitaasut kiffaangissuseqarlutik oqaaseqaateqarsinnaati-taaneranni pingaarnerusutigut tunngaviit arlallit atuupput. Siullertut pingaarnertullu nalinginnaasumik ilimagineqarpoq kia oqartussaasoq sinnerlugu oqaaseqaateqarsinnaanera aamma pineqartoq qanoq oqassanersoq pisortani oqartussaasup aalajangersinnaagaa. Pisortani atorfeqartitaasoq oqartussaasoq sinnernagu, namminerli imminut sinnerluni, oqaaseqaateqarpat kiffaangissuseqarluni oqaaseqaateqarsinnaatitaaneq pillugu malittarisassat atuutissapput.

Aamma nalinginnaasumik ilimagineqarpoq pisortani atorfeqartitaasut namminneq imminut sinnerlutik oqaaseqaateqarunik annertuumik kiffaangis-

suseqarlutik oqaaseqaateqarsinnaatitaasut – kiffaanngissuseqarlunili oqaaseqaateqarsinnaatitaaneq taanna aalajangersimasunik killissaqartinneqarpoq. Taamaalillutik pisortani atorfeqartitaasut nipangiussisussaataitanermik unioqqutitsissannginnertik eqqumaffigisariaqarpaat. Aammattaaq pisortani atorfeqartitaasut oqaaseqaataat eqqissisimanermik ataqinassutsimilluunniit innarliisuussanngillat, taamatuttaarlu sorraappallaartuussanatik. Kii-salu pisortani atorfeqartitaasut namminneq suliassaqarfigisaminni pissutsit pingaaruteqartut pillugit paasissutissanik eqqunngitsunik saqqummiussis-sanngillat.

Oqaaseqaatit piumasaqaatinik taakkuninnga eqqortitsisuugunik inatsimmik aallaavittut unioqqutitsisuussanngillat. Soorlu pisortani atorfeqartitaasup isornartorsiuinini suliffigisap iluani saqqummiuteqqaassagaa pisortani oqartussaasumi pisortaqtigiit piumasaqaatigisinnaanngilaat.

Qitiusumik inissisimasut aalajangersimasut eqqarsaatigalugit oqartussaasup nammineq ilumini aalajangiiniarnerata sulisinnaassusiatalu mianerineqarnissaat kiffaanngissuseqarluni oqaaseqaateqarsinnaatitaanermik suli annertunerusumik killilersueqqinnermut aammattaaq tunngavilersuutaasinnaavoq.

Pisortani atorfeqartitaasut kiffaanngissuseqarlutik oqaaseqaateqarsinnaatitaanerat pillugu malittarisassat Danmarkimi Justitsministereqarfiup ilitsersuusiani sukumiinerusumik allaaserineqarput. Ministereqarfiup malittarisassanik paasinninnera immikkoortumi tulliuuttumi sukumiinerusumik iserfi-gaara.

3.2. Justitsministereqarfiup pisortani atorfeqartitaasut kiffaanngissuseqarlutik oqaaseqaateqarsinnaatitaanerat pillugu ilitsersuusaa

Pisortani atorfeqartitaasut kiffaanngissuseqarlutik oqaaseqaateqarsinnaatitaanerat pillugu malittarisassat ilaatigut Justitsministereqarfiup pisortani atorfeqartitaasut kiffaanngissuseqarlutik oqaaseqaateqarsinnaatitaanerat ilitsersuutaani nr. 10062-mi, 28. oktober 2016-imeersumi allaaserineqarpoq, taannalu tassaavoq qulequtaq taannaasoq pillugu Justitsministereqarfiup i-

litsersuutaanik (nr. 87-imik, 14. september 2006-imeersumik) oqaatsitigut paasiuminarsarlugu saqqummiussineruvoq.

Uanga paasinninnera unaavoq ilitsersuut taanna suliassaqarfimmi tassani inatsiseqartitsinikkut atuuttunik eqqortumik allaaserinnittuusoq, aamma Kallaallit Nunaanni piffissami A-p oqaaseqaammik saqqummiussiffigisaata naalani. Taamaattumik ilitsersuummit tigulaakkat tulliuttuni ilannguppakka.

Justitsministereqarfiup pisortani atorfeqartitaasut kiffaanngissuseqarlutik oqaaseqaateqarsinnaatitaanerata pillugu ilitsersuutaanut siuleqummi inatsiseqartitsinikkut atuuttut tunuanni isiginiagassat arlallit allaaserineqarput:

“Pisortani atorfeqartitaasut ilisimasaminnik tamanut ammasumik oqallinnermi avitseqateqartarnerat tamat oqartussaaqataanerannut ingerlalluurtumut aalajangiisuusumik pingaaruteqarpoq.

Pisortani atorfeqartitaasut oqallinnermi peqataanerat atorfeqartunut ataasiakkaaginnaanngitsunut pingaaruteqarpoq. Tamanna inuiaqatigiinnut aamma taama pingaaruteqartigaaq, tassami pisortani atorfeqartitaasut – suliassaqarfigisamik iluini immikkut ilisimasaqarnertik misilittagaqarnertillu pissutigalugu – tamanut ammasumik oqallinnerup sulianut tunngasortaannik qaffassaaqataasinnaammata.” (Atorfeqarfimmi nutsigaavoq)

Oqaaseqaatip nammineq imminut sinnerluni oqartussaasorluunniit sinnerlugu saqqummiunneqarsimanerata sunniutaa ilitsersuusiami aamma allaaserineqarpoq:

“Pisortani atorfeqartitaasut Tunngaviusumik Inatsimmi kiffaanngissuseqarluni oqaaseqaateqarsinnaatitaaneq pillugu aalajangersakkakkut illersugaapput. Tassa imaappoq tamat oqallinneranni imminut sinnerluni peqataasoqarsinnaasoq, namminerlu isummanik assigiinngitsunik saqqummiussisoqarsinnaasoq. Tamanna oqaluuserineqartunut nammineq suliassaqarfigisamut tunngasunut aamma atuuppoq. Tamatuma saniatigut tamanna aammatuuppoq tamatumunnga peqatigitillugu allat sinnerlugit oqaaseqaateqartunut, soorlu sinniisunut, suliffimmi pissutsit pillugit isornartorsiuisumik suleqatigiikkuutaat sinnerlugit oqaaseqaateqartunut.

Pisortani atorfeqartitaasut kiffaanngissuseqarlutik oqaaseqaateqarsinnaatitaanerannik ilersuineq taamaallaat atuuppoq pisortani atorfeqartitaasutut imminut sinnerluni oqaaseqaateqarnermi.

Illua'tungaatigulli imaappoq oqartussaasoq sinnerlugu kia oqaaseqaateqarsinnaanera pillugu malittarisassanik pisortat suliffeqarfiutaanni pisortaqatigiit aalajangersaasinnaasut. Oqaaseqaatit oqartussaasoq sinnerlugu saqqummiunneqartut imaat eqqarsaatigalugit tunaartarisassat pisortaqatigiinnit aamma aalajangersarneqarsinnaapput.

Namminerli imminut sinnerluni oqaaseqaateqartoqarpat oqaaseqaateqaatiginiagaq saqqummiunnarlugu akuersissummik pissarsiarniartoqaqqaassasoq pisortaqatigiit piumasaqaatigisinnaanngilaat. Oqaaseqaatit nammineq imminut sinnerluni saqqummiunneqarnerat pillugu pisortaqatigiit ilisimatinneqassasut pisortaqatigiit aamma piumasaqaatigisinnaanngilaat.

Oqaaseqaateqarneq oqartussaasup isumaatut innuttaasunit kukkunikkut paasineqarsinnaappat nammineq imminut sinnerluni oqaaseqaateqarnerup erseqqissarneqarnissaa eqqumaffigisariaqarpoq." (Atorfeqarfimmi nutsigaavoq)

Pisortani oqartussaasup nammineq ilumini aalajangiiniarnerata sulisinnaassuseqarneratalu mianerisariaqarnerat pisortani atorfeqartitaasut aalajangersimasut kiffaanngissuseqarlutik oqaaseqaateqarsinnaatitaanerannik immikkut killissaliinermut oqaatigineqartutut tunngavilersuutaasinnaavoq. Suliasaqarfimmi tassani malittarisassat ilitsersuummi imatut eqikkarneqarput:

"Pisortani oqartussaasup nammineq ilumini aalajangiiniarneratalu sulisinnaassuseqarneratalu mianerisariaqarneranik naliliissagaanni imaappoq qulequtaq pineqartoq pillugu oqaaseqaateqartoqartariaqanngitsaq, pingaartumillu makku pingaartillugit isiginiarneqarsinnaapput:

- Oqaaseqaatigisaaq pissutsinut nammineq suliassaqaarfigisap iluaniittunut tunngasuaa?
Tassani killissaliineq nammineq suliassaqaarfigisap iluaniittut pillugit oqaaseqaatinuunnaq tunngasuuvoq.
- Oqartussaasumi qanoq inissisimaneq, aalajangiiniarnermullu qanoq qanitsigisumik inissisimasoqarsimava?
Killissaliineq sulisunut qitiusumik inissisimasunuunnaq aalajangiiniarnermi peqataasimasunut atuukkajuppoq. Atorfeqartitaasut naalakkersuinikkut allaffissornermillu aqutsinikkut aalajangiisartunut ungasissumi inissisimasut taamaattumillu aalajangiiniarnermi namminneq peqataanngitsut peqataasimanngitsulluunniit nalinginnaasutigut killilersuiffigineqarnaviannngillat.

- Oqaaseqaatigisaq aalajangiineq sioqqullugu aalajangiinerulluunniit kingornatigut saqqummiunneqarpa?
Oqaaseqaatigisaq aalajangiisoqarnera sioqqullugu imaluunniit aalajangiinermut peqatigitillugu tamanut saqqummiunneqartoq oqaaseqaatigisamit aalajangiineq kingoqquterujussuarlugu saqqummiunneqartumit oqartussaasup iluani aalajangiiniarnermut annertunerusumik ajoqusiisinnaavoq.
- Pisortani atorfeqartitaasutut atugassiissutit/nukissat suliffimmi siunissami pissutsinut, soorlu sipaarniuteqarnernut, annertuumik sunniuteqarsinnaasut pillugit oqaaseqaateqarnissamut annertunerusumik kiffaangissuseqarnarpoq.” (Atorfeqarfimmi nutsigaavoq)

Pisortani sulisitsisup isornartorsiut tamanut saqqummiunneqannginnermini suliffiup iluani saqqummiunneqassasoq piumasaqaatigisinnaangilaa. Ajornartorsiut taanna pillugu makku ilitersuummi oqaatigineqarput:

“Pisortani oqartussaasoq isornartorsiutigiunnakkaminik taakku suliffiup iluani, soorlu pisortaqaatigiinnut suliffimiluunniit sinniisumut, saqqummiuteqqaarnagit tamanut ammasumik saqqummiussisinnaatitaavoq. Pisunili arlalinni isornartorsiutigisap suliffiup iluani ingerlatseriaatsit aqputigalugit saqqummiuteqqaarnissaa pissusissamisoortuusinnaallunilu isumatusaartumik iliuusaasinnaavoq, ilaatigut pissutsit isornartorsiukkat aaqqinneqarnissaannut periarfissaqartitsinissaq aamma suliffimmi pissutsit siunissami suleqatigiinermut tunngasut eqqarsaatigalugit. Sulisitsisullu tamanna piumasaqaatit saqqummiussinnaangilaa.” (Atorfeqarfimmi nutsigaavoq)

Pisortani oqartussaasoq pisortani atorfeqartitaasut oqaaseqaateqarsinnaanerat pillugu aalajangersimasunik annertunerusunik piumasaqaateqarsinnaavoq. Tamanna ilitersuummi imatut allaaserineqarpoq:

“Pisortani atorfeqartitaasut – innuttaasutut allatulli – eqqissisimanermik ataqqinassutimilluunniit innarliisunik oqaaseqaateqaqqussanngillat. Oqaaseqaatit taamaattut pillaasarneq pillugu inatsimmi kapitali 27 tunngavigalugu pillarneqaataasussaapput [tamanna Kallaallit Nunaanni pinerluttulerineq pillugu inatsisikkut aalajangersaavigineqarpoq; uanga ilanngussara]. Ilaatigut pineqartut tassaapput pissutsit inummut allamut tunngalluinnartut pillugit paasissutissanik ingerlatitseqqilluni tunniussineq imaluunniit oqaaseqaatinik tunngavissaqanngitsumik pasilliinikkut ajuallatsitsissutaasunik saqqummiussineq.

Suliffigisaq pillugu sorraatsorujussuarmik ilusilinnik aamma oqaaseqaateqartoqaqqussaangilaq. Tassa imaappoq suliffigisami pissutsit pillugit sakkortuumik isornartorsiuilluni

oqaaseqaateqartoqarsinnaasoq, pissutsit taamaaliornissamut tunngavissaqartitsippata. Sorraatsorujussuarmilli ilusilinnik oqaaseqaateqartoqaqqusaanngilaq.

Tamakkua saniatigut nammineq suliassaqarfigisap iluani pissutsit pingaaruteqartut pillugit paasissutissanik erseqqissumik eqqunngitsunik saqqummiussisoqaqqusaanngilaq.

Matuma erseqqissarneqarnissaa pingaartuuvoq, tassalu pisortaqatigiit pisortani atorfeqartitaasunut kiffaanngissuseqarluni oqaaseqaateqarsinnaatitaanermi killissaliissutinik ilitsersuummi matumani allaaserineqarsimasut saniatigut killissaliisinnaanngitsut. Taamaalilluni atorfeqartitaasup kiffaanngissuseqarluni oqaaseqaateqarsinnaatitaanerani atorfeqartitaasup taassumalu suliffiata ilumoorfigeqatigiittussaataanerata innersuussutigalugu annertunerusunik killissaliiniartoqarsinnaanngilaq.” (Atorfeqarfimmi nutsigaavoq)

Pisortani oqartussaasut oqaaseqaatit inatsisinik unioqqutitsisuunngitsut kingunerisaannut pisuni aalajangersimasuni qisuariarnissaminnut periarfissaqarput, assersuutigalugu pisortaqatigiit nanertuutaasumik qisuariaataannik taaneqartunik, soorlu soraarsitsinermik. Tamanna ilitsersuummi imatut allaaserineqarpoq:

“Pisortani atorfeqartitaasooq tunaartarisassat ilitsersuummi matumani allaaserineqarsimasut tunngavigalugit oqaaseqaateqarpat oqaaseqaateqaatigineqartut inatsisinik unioqqutitsisuussanngillat. Tassa imaappooq oqaaseqaatigineqartut imminni soraarsitaanermik imaluunniit toqqaannartumik toqqaannanngitsumilluunniit pineqaatissinneqarnermik – soorlu atorfeqartitaasup suliassaqarfianik allannguinnermik imaluunniit atorfeqartitaasup akissarsianut tapinik tunniussinermut atatillugu ilaatinneqanngitsoorneranik – nassataqarsinnaanngitsut.

Pisoqarsinnaavorli oqaaseqaatit inatsisinik unioqqutitsisuunngitsut – soorlu suleqatigiinnermi ajornartorsiutinut tunngasut – kingunerisaat ima ilungersunartigisinnaallutik pisortaqatigiit pisortani atorfeqartitaasumut qisuariaatinik taaneqartunik atuisariaqalersillugit.

Pisortaqatigiit pisuni taamaattuni suleqatigiinnermi ajornartorsiutit annertuujussasut, ajornartorsiutit atorfeqartitaasup pingaarnerusutigut pisuussutigissagai aamma suleqatigiinnermi ajornartorsiutit atorfeqartitaasumut akuliuffiunnginnerpaamik aaqqinniarneqarsimassasut piumasqaatit immikkut eqqumaffigissavaat. Pisortaqatigiit pissutsit taaneqartut uppersarsarsinnaanerlugit uppersarsarsuinikkullu immikkut qularnaassuseqartuutitsinissap tamatumunnga atatillugu piumasqaataanera tamatumunnga peqatigitillugu eqqumaffigissavaat. Pisortaqatigiit tamatuma saniatigut pisortani atorfeqartitaasut kiffaanngissuseqarlutik oqaaseqaateqarsinnaatitaanerata annertuumik mianerineqartussaanera eqqaamassavaat.

[...]"

4. Suliamik uanga naliliinera

4.1. Oqaaseqaatigisaq nammineq imminut sinnerluni saqqummiunneqar-nersoq

Kommuneqarfik Sermersuup suliami pingaarnertut isumaatut paasisakka naliliininnut atatillugu allaaseraakka. Kommunip suliami tunngavilersuutaa-nik sukumiisumik allaaserinninneq eqqarsaatigalugu suliap ingerlasimanera-nik allaaserisaq innersuussutigaa.

Qulaani oqaatigineqartunit ersertutut pisortani oqartussaasut kiffaanngissu-seqarlutik oqaaseqaateqarsinnaatitaanerata taamaallaat illersugaavoq oqaaseqaat pineqartoq nammineq imminut sinnerluni saqqummiunneqarsimapat.

Kommuneqarfik Sermersuup paasinninnera unaavoq A-p oqaaseqaataanik atuartut isumaqassasut oqaaseqaat kommuni sinnerlugu saqqummiunneqarsimasoq. Taamaalilluni Kommuneqarfik Sermersooq assuarinnissummini imatut allappoq:

"Piffissap suliffiusup iluani KNR-ip nittartagaatigut oqaaseqaateqarsimavutit, [...], tamatumalu allat qularnaalluinnartumik isumaqalersissinnaallugit suliannut ilaatillugu oqaaseqaateqarsimasutit."

Oqaaseqaammik atuartut oqaaseqaat kommunip isumaatut paasisinnaagaat sumik tunngaveqartoq Kommuneqarfik Sermersuup uannut oqaaseqaammিনি sukumiinerusumik nassuiarpaa. Kommunip paasinninnerminut ikorfartuutit ilaatigut oqaatigaa A Nuummi "amerlanersaasa ilisarisimaqatigiiffigisaan-ni" sulisuusoq, taamaattumillu, uanga paasisattut, A-p sumi sulinera nal-inginnaasumik ilisimaneqartoq. Kommunip manna naliliinermi aammattaaq ilannguppaa, tassalu A kommunimi ukiuni arfineq pingasuni sulisimasoq,

kommunillu iluani avataanilu suleqatigisartakkanut annertoorujussuarmik attuumassuteqarfeqartoq.

Pisortani atorfeqartitaasut kiffaanngissuseqarlutik oqaaseqaateqarsinnaati-taanerannut aallaaviusoq tassaavoq pisortani atorfeqartitaasut inuiaqatigiit ammasumik oqallinneranni innuttaasutut allatulli peqataasinnaasut. Taama-tuttaaq pisortani atorfeqartitaasup, nipangiussisussaataaneq pillugu malit-tarisassat isiginiarlugit, atorfeqartitaanerminut tunngasut nassatarisaannik suliassaqarfik pillugu immikkut ilisimasaqarnini malugeqqusinnaavaa. Taa-maalilluni oqallisissiatut ilanngussap tunuani suliamut immikkut ilisimasat i-laanersut atuartup ilaatigut nalilersinnaavaa.

Oqaaseqaat oqartussaasoq sinnerlugu saqqummiunneqartutut aatsaat kuk-kusumik paasineqarsinnaappat oqaaseqaat nammineq imminut sinnerluni saqqummiunneqartoq pisortani atorfeqartitaasup erseqqissassavaa.

Folketingip Ombudsmandiata 1998-imi ukiumoortumik nalunaarutaani qup-vernerni 319-imi tulliinilu, pingaartumillu imm. 3-mi kiisalu 2006-mi ukiu-moortumik nalunaarummi quppernerni 128-mi tulliinilu isummat tamatu-munnga atatillugu ilaatigut innersuussutigaakka.

Kommuneqarfik Sermersuup suliap ilaanik taassuminnga paasinninnera ila-lersinnaanngilara.

Taamaalillunga piffissaq oqaaseqaatip tamanut saqqummiunneqarfia oqaa-seqaatip kommuni sinnerlugu saqqummiunneqarsimasutut paasineqarsin-naaneranut qanoq ililluni sunniuteqarsinnaanersoq takujuminaatsittorujus-suura.

Uanga paasinninnera unaavoq atuartut aalajangersimasut oqaaseqaatip Kommuneqarfik Sermersuumi atorfeqartitaasumit allanneqarsimaneranik ili-simasaqarsinnaanerisa imminni oqaaseqaatip kommuni sinnerlugu saqqum-miunneqarsimasutut paasineqarsinnaanera nassatarinngikkaa.

Ataatsimut isiginnillunga isumaqarpunga oqaaseqaat imarisamisut imaqarluni oqaasertalersugaanermisullu oqaasertalersugaalluni A-p imminnut sinnerluni saqqummiussimasaatut erseqqissumik isikkoqartoq, oqaaseqaatillu Kommuneqarfik Sermersooq sinnerlugu saqqummiunneqarsimasutut innutaasunit paasineqarsinnaaneranut tunngavissaasinnaasunik takusaqarsinnaanngilanga. Taamaattumik oqaaseqaat kiffaanngissuseqarluni oqaaseqaateqarsinnaatitaaneq pillugu malittarisassani pineqartunut ilaatinneqarpoq.

4.2. Oqaaseqaat pisortani atorfeqartitaasut kiffaanngissuseqarlutik oqaaseqaateqarsinnaatitaanerani pillugu malittarisassanik eqqortitsisuunersoq

4.2.1. Takussutissiaq

Oqaaseqaat killilersuutinik pisortani atorfeqartitaasut kiffaanngissuseqarlutik oqaaseqaateqarsinnaatitaanerannut atuuttunik arlalinnik unioqqutitsisuunersoq kiisalu Kommuneqarfik Sermersooq killilersuutinik taakkuninnga eqqortumik isummerfiginnissimanersoq matumani naliliivunga.

Siullertulli Kommuneqarfik Sermersup suliap inatsiseqartitsinikkut sinaakku-taanik pingaarnerusutigut paasinninnera pillugu arlalinnik oqaaseqaateqarpunga (imm. 4.2.2-mi).

Tamatuma kingornatigut pisortani atorfeqartitaasut kiffaanngissuseqarlutik oqaaseqaateqarsinnaatitaaneranni killilersuutit pineqartut suliamut attuumassuteqartut sukumiinerusumik isummerfigaakka:

- A kommunimi inississimanini pissutigalugu oqaaseqaateqarnissaminut tunuarsimaartariaqarsimagaluarnersoq (imm. 4.2.3-mi)
- A-p isornartorsiuinini kommunip iluani saqqummiutissagaa kommunip piumasaqaatigisinnaaneraa (imm. 4.2.4-mi)
- Oqaaseqaatit sorraatsorujussuarmik ilusiligaanersut (imm. 4.2.5-imi).

Tamatuma kingornatigut eqikkaavunga uanga paasinninnera unaanersoq oqaaseqaat inatsisinik unioqqutitsisuunngitsoq (imm. 4.2.6-imi).

Oqaaseqaatip sunniutitut kingunerisinnaasai tamatuma kingornatigut nagasiutitut isummerfigaakka (imm. 4.3-mi).

4.2.2. Kommuneqarfik Sermersup suliap inatsiseqartitsinikkut sinaakkutaanik pingaarnerusutigut paasinninnera

A-p oqaaseqaataa oqaatigineqartutut kiffaanngissuseqarluni oqaaseqaateqarsinnaatitaaneq pillugu malittarisassanit illersugaavoq. Tassa ilaatigut imaappoq A-p sulisitsisuata, Kommuneqarfik Sermersuup, oqaaseqaateqarsimanera immi kisiat pissutigalugu assuarisinnaagaa, oqaaseqaataa killisaliissutinik erseqqissunik pisortani atorfeqartitaasut kiffaanngissuseqarlutik oqaaseqaateqarsinnaatitaanerannut atuuttunik unioqqutitsisuuppat. Tamatumunnga atatillugu matuma tikkuarnissaa pingaartuuvoq, tassalu kommuni tamatumunnga atatillugu isiginiagassanik allanik ilanngussinissaminut periarfissaqanngitsoq. Killilersuutit erseqqissut taakku oqaatigineqartutut Justitsministereqarfiup pisortani atorfeqartitaasut kiffaanngissuseqarlutik oqaaseqaateqarsinnaatitaanerata pillugu ilitersuusianit erserput.

Tamatumunnga uiggiullugu oqaatigaara Kommuneqarfik Sermersuup uannut oqaaseqaataa imatut paasigiga, tassalu A-p oqaaseqaataata ima pissuseqartoq taassuminnga nammineq imminut sinnerluni saqqummiussisinnatitaanani. Oqaaseqaat aammattaaq isumaqalersitsivoq kommunip suliamik paasinninnerata A-p oqaaseqaataata "pissutsinik ajornartorsiutaasinnasunik ilusilersorluagaasumik tikkuaannginnera"-rata ajornartorsiutaaneramik tungaveqartoq. Taamaalilluni kommuni uannut oqaaseqaammimi ilaatigut imatut allappoq:

"[Isornartorsiutit aalajangersimasut ingerlatsiviup iluani saqqummiunneqartarnissaannik kommunip piumasagaataanut [uanga ilanngussara] Inatsiseqartitsinikkut tunngavigisaq "God adfærd i det offentlige"-mi 2007-imeersumiippoq, taannalu Kommuneqarfik Sermersuup tigulaariffigisimavaa, intranetsikkullu Sermeeqqakkut tamanut saqqummiullugu, "Ytringsfrihed for offentligt ansatte"-mik qulequtserlugu. Kiffaanngissuseqarluni oqaase-

qaateqarsinnaatitaaneq, nipangiussisussatitaaneq isornartorsiutinillu saqqummiussineq pillugit kommunip tunaartarisassai tassani allaaserineqarput, imaattunillu allassimasoqarpoq: "[...] Aalajangiinernik ataqqinninnerup suliffimmut ilumoorfiginninnerinnaannginnera aammali pissutsinik isornartunik ilusilersorluagaasumik tikkuaasernerup suliffimmut ilumoorfiginninnerunera pisortat sulisullu eqqumaffigisariaqarpaat.

[...]

Taamaalillutik MIA-mi [Meeqqanik, Ilaqutariinnik Atuarfinnillu Ingerlatsivimmi, uanga ilanngussara] pisortaqatigiit kiffaanngissuseqarluni oqaaseqaateqarsinnaatitaaneq assortunngilaat, tikkuarluguli oqaatigalugu pisumi matumani A-p "pissutsinik isornarsinnaasunik ilusilersorluagaasumik tikkuaannginera" pineqartoq. [...]" (Atorfeqarfimmi nutsigaa-voq)

Suliami A-p kiffaanngissuseqarluni oqaaseqarsinnaatitaanerani kommunip assortuinnginnerani, isornartorsiuineratali ilusilersorluagaannginnerani tikkuaaginnarnerani Kommuneqarfik Sermersuup oqarnera paatsuungassutigaara. Oqaatigaara tunaartarisassani oqaasertaliineq oqaaseqaat "pissutsinik isorisariaqarsinnaasunik tikkuaaneq ilusilersorluagaassasoq" oqaaseqaatip sorraassusia pillugu kommunip uannut oqaaseqaataani aamma ilaasoq.

Aammattaq oqaatigaara oqaasertaliineq pineqartoq – kommunip oqaaseqaammi aamma oqaatigisaatut – ilitersuusiamit "God adfærd i det offentlige"-meersuusoq, taannalu Danmarkimi Personalestyrelsemit, KL-imit aamma "Danske Regioner"-mit 2007-imi saqqummersinneqarpoq. Oqaasertaliinerli taanna Justitsministereqarfiup pisortani atorfeqartitaasut kiffaanngissuseqarlutik oqaaseqaateqarsinnaatitaanerani pillugu ilitersuusiani imm. 11-mi aammattaq ilaavoq. Iltersuusianili taakkunani marlunni immikkoortoq oqaasertaliinerup taassuma ilaaffia pisortani atorfeqartitaasut kiffaanngissuseqarlutik oqaaseqaateqarsinnaatitaaneranni killiliissutinut tunngasuunngilaq, suliffeqarfiilli ataasiakkaat iluanni oqallinnermut ammasuunermullu tunngasuulluni.

Kommunimi sulisut tamanut ammasunik isornartorsiuisagunik taamaallaat ilusilersorluagaasumik taamaaliorinnaasut Kommuneqarfik Sermersuup piumasaqaateqarsinnaanera pisortani atorfeqartitaasut kiffaanngissuseqar-

lutik oqaaseqaateqarsinnaatitaanerat pillugu malittarisassani atuuttuni aamma tunngavissalernerneqanngilaq. Pisortanilu atorfeqartitaasut kiffaanngissuseqarlutik oqaaseqaateqarsinnaatitaanerannik paasinninneq taanna Kommuneqarfik Sermersuup suliamik suliarinninnerani qanoq ililluni atorneqarsinnaanersoq aamma assut paasiuminaatsippara.

Tamanna tunngavigalugu isumaqarpunga Kommuneqarfik Sermersuup uanut oqaaseqaataanik ilusiliinerup manna ilungersunartumik nalorninarsisikkaa, tassalu kommunip suliaq suliamut inatsiseqartitsinikkut sinaakkutaasoq, matumani killissaliissut suut pisortani atorfeqartitaasut kiffaanngissuseqarlutik oqaaseqaateqarsinnaatitaanerannut atuunnerat ilanngullugu eqqarsaatigalugu, ilumut eqqortumik paasillugu suliarisimaneraa.

Oqaaseqaatip killilersuutit taakku eqqortinnerai tulliuttuni sukumiinerusumik isummerfigaara.

4.2.3. A-p Kommuneqarfik Sermersuumi inissisimanera aamma kommunip ilumini aalajangiiniarnerata sulisinnaassusiatu mianerineqarnissaat

Justitsministereqarfiup pisortani atorfeqartitaasut kiffaanngissuseqarlutik oqaaseqaateqarsinnaatitaanerat pillugu ilitsersuusiaanit ersertutut pisortani oqartussaasut iluminni aalajangiiniarnerisa sulisinnaassuseqarnerisalu mianerineqarnissaat sulisut pisuni immikkut ittuni oqaaseqaateqarnissaminnut tunuarsimaarnissaannik nassataqarsinnaasoq.

Killilersuut taanna sulisup nammineq suliassaqarfigisami iluanut tunngasut pillugit oqaaseqaateqarnerani taamaallaat atuuppoq. Killilersuut taanna sulisunut qitiusutut inissisimasunut aalajangiiniarnermi ilaasimasunut taamaallaat aammattaq atuuppoq.

Imatut paasivara A-p Kommuneqarfik Sermersuumi inissisimanera kommunip suliamik naliliiviginninnerannut sunniuteqarsimasoq. Taamaalilluni assuarinnissummit erserpoq Kommuneqarfik Sermersuup oqaatigigaa A-p oqaaseqaataa imaattoq:

“[...] Naalackersuisoqarfik suleqatitta qaninnerpaat ilaat isertuarnak isornartorsiorlugu. Sulisup ilittut inissisimasup Naalackersuisoqarfimmik tamanut ammasumik isornartorsiuinera akuerineqarsinnaanngilaq. Pingaartumillu suliamut atasumik, oqallittarfimmilu tamanut ammasumi taamaaliernerit.” (Atorfeqarfimmi nutsigaavoq)

Isuma taanna Kommuneqarfik Sermersuup uannut oqaaseqaammini itisilerpaa. Kommuni imatut paasivara KNI-p allaaserisaa A-p oqaaseqaateqarfīgisaa pissutsinut kommunip pisinnaatitaanerani ilaangitsunut tunngasuu-soq. Kommunili imatut aamma paasivara A oqaaseqaammi Atuarfik Samuel Kleinschmidtimit innersuussinini pissutigalugu nammineq suliassaqarfīgisani ilanngukkaa, tassami atuarfinnut atuarfiillu pisortaannut tunngasut pillugit suliassaqarfimmi pisortatut kommunip atuarfii pillugit aalajangiiniarnerni ataatsimut peqataasarami.

Kiisalu A-p kommunimi inissisimanera pillugu Kommuneqarfik Sermersuup makku oqaatigai:

“A atuarfinni ilinniartitsisutut aamma Kommuneqarfik Sermersuumi Atuarfinnik Ingerlatsivimmi atuarfinnut siunnersortitut sivisuumik atorfeqartitaasimavoq, Nuummi inissisimalluni, kingullermullu taaneqartumut atatillugu atorfinitsinneqarnera pillugu allakkani allasimavoq malittarisassat tjenestemandinut atuuttut aalajangersakkallu atorfimmu tassunga immikkut atuuttut malitassaralugit. Atorfinitsitsineq pillugu allakkat 14. marts 2014-imeersut **ilanngussarlu 5** takoqqikkīt. Atorfia suliaalu pillugit allaaserisami “Atuarfinnut immikkoortortaqarfimmi sulisut makku suliassaraat”-mik qulequttap ataani pineqartup akisussaaffia pillugu imaattunik allasimasoqarpoq:

- Atuarfinnut immikkoortortaqarfiup suleqatīgisartagai suleqatīgialugit *nunami tamar-mi najukkamilu naalackersuinikkut anguniakkat eqqortissallugit* [Allaqaarneqarnerani quppernerup ataani nassuiaasiussaḡ: Uanga erseqqissaanera.]
- Suliat suliassallu tamaasa pimoorullugit, suliamut attuumassuteqartumik sukumii-sumillu suliarissallugit.
- Ataatsimut pisinnaatitaanerit ingerlaavartumik iluarsartuutissallugit.
- Atuarfiup suliassaqarfiata ataatsit arlallilluunniit iluanni immikkut ilisimasassanik pissarsissalluni taakkulu aserfallatsaalissallugit.

Allaaserisami oqaaseqaatīgisaminut tunngasuni aalajangiiniarnermi peqataasimannīgikku-luartoq suliassaqarfīgisaanit erserpoq *atuarfinnut immikkoortortaqarfiup suleqatīgisartagai*

suleqatigalugit nunami tamarmi najukkamilu naalackersuinikkut anguniakkat eqqortissagai [...]. Pisortaqatigiit paasinninnerat unaavoq oqaaseqatigisai kommunimi atorfeqartitaaneranut ataqatigiissinneqarsinnaanngitsuussanngitsut, Ilinniartitaanermut, Ilisimatusarnermut Ilageeqarnermullu Naalackersuisoqarfimmik suleqateqarneq eqqarsaatigalugu inissisimanera qitiusumiippat, oqaaseqaatip tamat oqallittarifianni KNR-ip nittartagaatut Facebookitulli ittuni saqqummiunneqarsimanera pingaartumik eqqarsaatigalugu.

Atorfiup suliassallu allaaserineqarneranni siusinnerusukkut taaneqartumi suleqatigisartakkat pillugit imaattunik allassimasoqarpoq:

“Avataani suleqatigisartakkat oqartussaasullu allat, suleqatigiiffiit suliniaqatigiiffiillu. (...)

Siunnersortit suleqatigisartagaat allat tassaapput atuarfeqarfiup pisortaa, pisortap tullia, atuarfiit pisortaat (allaqqaarneqarnerani quppernerup ataani nassuiaasiussa: Uanga erseqqissaanera), suliassaqarfimmi suleqatigisat (MISI [Meeqqanut Inuusuttunullu Siunnersuisoqarfik; uanga ilanngussara], atuarfinni aqutissiuisut, Inerisaavik) atuarfeqarfimmut tunngasut iluani.”

Atuarfiup pisortaa B-p (B-p) oqaaseqaateqarnermigut A akerlilerpaa, Atuarfik Samuel Kleinschmidt illersorlugu. Naak A-p oqaaseqaataata oqaaseqaatip saqqummiunneqareernerani B-p A-llu suleqatigiinneranni ajornartorsiutinik kinguneqanngikkaluartoq atuarfinnut siunnersortip ASK-imik taassumalu pisortaanik “oqaatsit atorlugit saassussinera” pisortaqatigiit akuerisinnaanngilaat.” (Atorfeqarfimmi nutsigaavoq)

Kommuneqarfik Sermersuup suliap ilaanik taassuminnga paasinninnera isumaqatiginngilara. Taamaalillunga isumaqarpunga assuarinninneq A-p kommunimi inissisimanerata taassuma kiffaanngissuseqarluni oqaaseqaateqarsinnaatitaaneranut qanoq sunniuteqarneranik kukkusumik takutitsisuuvoq, taamatuttaarlu A-p inissisimanerata suliambut sunniutaanik kommunip nalilinnera aamma ilalersinnaanagu.

Taamaalilluni uanga paasinninnera unaavoq A-p assuarineqarnera immiini imatut paasisariaqartoq Kommuneqarfik Sermersooq isumaqartoq A kommunip Ilinniartitaanermut, Kultureqarnermut, Ilisimatusarnermut Ilageeqarnermullu Naalackersuisoqarfimmik suleqateqarnerani qitiusumik inissisimanini pissutigalugu Naalackersuisoqarfik pillugu isornartorsiuilluni oqaaseqaammi inuinnartut saqqummiussinissamut ataatsimut tunuarsimaartariaqartoq.

Uanga paasinninnera unaavoq una qularnaateqanngitsoq, tassalu A Kommuneqarfik Sermersuumi atuarfinnut siunnersortitut taamatut ataatsimut pisussaaffiligaanngitsoq.

Taamaattumik isumaqarpunga assuarinninneq taamaalilluni malittarisassanik A-p Kommuneqarfik Sermersuumi atuarfinnut siunnersortitut kiffaanngissuseqarluni oqaaseqaateqarsinnaatitaaneranut ataatsimut atuuttunik kukkusorujussuarmik takutitsisusoq.

A kommunip aalajangiiniarnera sulisinnaassuseqarneralu eqqarsaatigalugit oqaaseqaammik pineqartumik saqqummiussisimassanngikkaluartoq Kommuneqarfik Sermersuup oqarnera oqaatigineqartutut aamma isumaqatiginngilara.

Taamaalilluni A-p oqaaseqaataa siullertut pissutsimut Kommuneqarfik Sermersuup oqaatigisaanik uanga paasinninnittut taassuma suliassa qarfiata avataaniittumut tunngasuuvoq – tassalu atuarfiit sorliit Danmarkimi atuartisinermut ministerip takussanera. Oqaaseqaatilli pisortani atorfeqartitaasup nammineq suliassa qarfianut tunngasut kisiisa eqqarsaatigalugit pisortani atorfeqartitaasoq oqartussaasup aalajangiiniarnera sulisinnaassuseqarneralu mianeriniarlugit oqaaseqaateqarnissamut tunuarsimaassasoq pisortani oqartussaasup piumasaqaatigisinnaavaa. Taamaattumik uanga paasinninnera unaavoq oqaaseqaatip ilaa taanna pissutsinut A-p oqaaseqaateqarfigissallugit tunuarsimaarfigisariaqagaanut tunngasuunngitsoq.

Aappaattut A-p oqaaseqaammuni Kommuneqarfik Sermersuumi atuarfinni ataatsimut pissutsit innersuussutigai. Tamanna imatut paasivara taanna A-p nammineq suliassa qarfigisaanut tunngasuusoq. Oqaaseqaatilli ilaa taanna kommunip tungaanit aalajangiinermut immikkut ittumut attuumassuteqanngilaq. Taamaattumik kommunip aalajangiiniarnerata sulisinnaassuseqarneratalu ilai sorliit oqaaseqaatip ilaanit tassanga sunnerneqarsinnaassanersut ataatsimut isiginnillunga takujuminaatsittorujussuuvava.

Suliaq Folketingip Ombudsmandiata 1987-imi ukiumoortumik nalunaarutaa-
ni quppernerna 237 tulliinu issuarneqartoq tamatumunnga atatillugu inner-
suussutigaaara, tassanngalu ilaatigut makku erserput:

"[...] pisortani atorfeqartitaasup kiffaanngissuseqarluni oqaaseqaateqarsinnaatitaanerani
killilersuutit akuerineqassappata immikkut oqimaassuseqartunik tunngavilersuisoqarnis-
saa piunasaqaataasooq, ilaatigullu tunngavilersuutit taakku sulisut qitiusutut inissisimasut
aalajangiinerup assortuussutaasup pilernerani peqataasut peqataasimasulluunniit kisiisa
eqqarsaatigalugit piugajuttassasut." (Atorfeqarfimmi nutsigaavoq)

Oqaaseqaatip imarisaa tunngavigalugu ataatsimut isiginnillunga paasinnin-
nera erseqqissoq unaavoq suliaq taanna imatut immikkut ittuunngitsoq, tas-
salu A Kommuneqarfik Sermersuumi inissisimanini pissutigalugu kommunip
aalajangiiniarnera sulisinnaassuseqarneralunniit mianeriniarlugit oqaaseqaa-
teqarnissamut tunuarsimaarnissamut pisussaaffeqartoq.

Tamatumunnga atatillugu isummat tassunga assingusut oqaaseqaammi
2014-imi ukiumoortumik nalunaarutinni immikkoortutut 5.9-tut ilanngunne-
qartumi, pingaartumillu oqaaseqaammi imm. 3.2-mi, saqqummiussakka in-
nersuussutigaaakka.

4.2.4. Kommuneqarfik Sermersuup isornartorsiutit kommunip iluani saq- qummiunneqartarnissaannik piunasaqaataa

Justitsministereqarfiup pisortani atorfeqartitaasut kiffaanngissuseqarlutik o-
qaaseqaateqarsinnaatitaanerani pillugu ilitersuusianit ersertutut sulisup i-
sornartorsiummik tamanut ammasumik saqqummiussinnginnermini suliffigi-
sami iluani saqqummiusseqqaartarnissaa pisortani sulisitsisup piunasaqaa-
tiginnaangilaa.

Pisortanili sulisitsisup sulisup isornartorsiummik soorlu tusagassiuutitigut
saqqummiussinnginnermini suliffigisami iluani saqqummiusseqqaartarnissaa
neriuutigalugu oqaatiginninnissaanut akornutissaqanngilaq. Folketingip Om-
budsmandiata 1995-imi ukiumoortumik nalunaarummini quppernerna 432
tulliinu tamanna pillugu allaaserinninnera imaattoq innersuussutigaaara:

“Atorfeqartitaasut oqartussaasumik pitsaasumik eqqartuisarnissaannik aamma atorfeqartitaasut isornartorsiutiminnik saqqummiussinermut suliffiup iluani periaatsinik atuisarnissaannik taamaattumillu isornartorsiutiminnik tamanut ammasumik saqqummiussisannginnissaannik pisortat suliffiutaanni pisortaqaatigiit kissaateqarnerminnik naatsorsuutiginninnerminnilluunniit ataatsimut oqaatiginninnerisa oqaaseqaateqarnissannut pissutissaqalersissinnaanngilaannga.

Isumaqarpungali pisortaqaatigiit naatsorsuutigisaat kissaatigisaalluunniit kiffaanngissuseqarluni oqaaseqaateqarsinnaatitaanermik inatsiseqartitsinikkut killiliissutitut paasineqarsinnaajunnaarlugit oqaasertalersorneqartariaqartut:

Taamaalilluni pisortani atorfeqartitaasoq oqartussaasup pitsaanngitsumik eqqartornissaanut aallaavittut pisinnaatitaavoq, taamaaliornermigut ilumoorfiginnittussaataani sumiginnanngikkuniuk.

[...]

Pisortani atorfeqartitaasoq isornartorsiugassaqaruni isorisaminik suliffiup iluani periaatsinik tassunga atugassanik (pisortaqaatigeeqarnermik/suleqatigiinnermi ataatsimiititaliaqarnermik/sinniisoqarnermik) atueqqaanngikkaluarluni tamanut ammasumik saqqummiussinissaminut pisinnaatitaavoq.

Isorisassaqaraanni isorisanik (aaqqiagiinngissutinillu) suliffiup iluani periaatsit kommunip kaammattuutiginiarpagit pisortani atorfeqartitaasup kiffaanngissuseqarluni oqaaseqaateqarsinnaatitaanerata manna taamaalilluni nassataraa, tassalu kommunip kaammattuuteqarnerminut peqatigitillugu atorfeqartitaasunut erseqqissassagaa isorisamik tamanut ammasumik saqqummiussinissamik atuerusunneq kaammattuummit taamaattumit killilersorneqanngitsoq.” (Atorfeqarfimmi nutsigaavoq)

Kommuneqarfik Sermersoorli assuarinninnermini A-mut ilaatigut imatut allappoq:

“Atuarfitta ilaat pillugu tamanut ammasumik oqaaseqaateqarnerit atuarfiullu pitsaassuseqarnera pillugu oqalliserinninnerit akuerineqarsinnaanngilaq. Suliaq tamanna kommunip nammineq iluani pisariaqarpoq. Atuarfimmi sulisut tamanna imminnik suliaminnillu tamanut ammasumik isornartorsiuinertut pissutissaqarluarlutik paasisinnaavaat.

Atuarfitta pitsaassuseqartinneqarnerat oqallisigineqassasoq ingerlatsiviup kissaatigippagu oqallinneq uagut aqussavarput, kiisalu oqalliffimmik, ilusianik aamma piffissamik/sumiiffimmik toqqaanitsinni silatusaarluta pissalluta.” (Atorfeqarfimmi nutsigaavoq)

Isuma taanna Kommuneqarfik Sermersuup uannut oqaaseqaammini itisilerpaa. Kommunip ilaatigut makku oqaatigai:

“Kalaallit Nunaanni pisortani atorfeqartitaasutut inuiaqatigiinni inuttaasutut allatulli kiffaanngissuseqarluni oqaaseqaateqarsinnaatitaasoqarpoq. Tamanna Tunngaviumik Inatsimmi § 77-ikkut qulakkeerneqarpoq:

“Kinaluunniit eqqarsaatini naqitatigut, allakkatigut oqalunnermigulluunniit tamanut saqqummiunnissaannut pisinnaatitaavoq, taamaattorli eqqartuussivinnut akisussaaffeqarluni. Saqqummiunniakkanik misissuilluni killiliisarneq allatullu kikkulluunniit isumaannik saqqummiussisinnaveersaernerit qaquguluunniit atulerseqqinneqanngisaannassapput.”

Tassa imaappoq innuttaasut tamarmik – aamma pisortani atorfeqartitaasut – suulluunniit oqaatigisinnaagaat – *taamaaliornissamut akuereqqoqqaanngikkaluarlutik* [Allaqqarneqarnerani quppernerup ataani nassuiaasiussaq: Uanga erseqqissaanera]. Taamatutaaq oqaaseqaateqarniarneq akornuserneqassanngilaq. Kiffaanngissuseqarlunili oqaaseqaateqarsinnaatitaaneq aamma isumaqarpoq oqaaseqaatigisatit illit nammineq akisussaaffigisagitit. [...]

Taamaallitutik MIA-mi [Meeqqanik, Ilaqutariinnik Atuarfinnillu Ingerlatsivimmi, uanga ilanngussara] pisortaqtigiiit kiffaanngissuseqarluni oqaaseqaateqarsinnaatitaaneq assortunngilaat, tikkuarluguli oqaatigalugu pisumi matumani A-p “pissutsinik isornarsinnaasunik ilusilersorluagaasumik tikkuanaanera” pineqanngitsoq. Pisortaqtigiiit naliliinerat unaavoq manna akuerineqarsinnaanngitsoq, tassalu A-p atuarfiup pisortaanit suliassa qarfiullu pisortaanut siunnersortitut ilitsersuisutullu atuarfimmik siunnersussallugu akisussaaffigisaminik oqallittarfimmi tamanut ammasumik taama isertuannngitsigisumik isornartorsiuinera. Pisortaqtigiiit manna akuerineqarsinnaanngitsutut isigaat, tassalu A-p oqaaseqaatimini Atuarfik Samuel Kleinschmidtinik nikassaanera, tamannalu pissutigalugu siunnersuinermit ilitsersuinermit tatigineqarneq pilersikkuminaatsorujussuanngortikkaa. Pisortaqtigiiit naliliipput suliffimmi pissuserissaarnermi manna aamma ilaasoq, tassalu isornartorsiuineq ingerlatsiviup atuarfinnut immikkoortortaqarfianut atuarfinnili pisortaqtigiinnut sammitinneqassasoq, isornartorsiuinermit atuarfiup angusai pitsaanngitsut atuarfiulluunniit kusa-naallisimanera pineqarpata. Taamaattumik suliassa qarfiup pisortaata paasinninnera unaavoq siuliani taaneqartut qanoq iliorluni pitsaanerulersinneqarsinnaanerit pillugu atuarfiup

pisortaanik oqaloqateqalerneq ileqqorissaarnerusoq, inuit attaveqaqatigiittarfii nittartak-kallu assigiinngitsut aqqutiginaqit.” (Atorfeqarfinmi nutsigaavoq)

Kommuneqarfik Sermersuup oqaaseqaataa pingaarnerusutigut imatut paasivara kommunip paasinninnera unaasoq A-p kommunimi inissisimanerata aamma oqaaseqaatip imaata sorraassusiata manna nassatarigaa, tassalu Atuarfik Samuel Kleinschmidt-pitsaassuseqarnera pillugu apeqqut kommunip iluani saqqummiussimasariaqaraluaraa, imaanngitsoq pisimasutut KNR-ip nittartagaani oqaaseqaat aqqutigalugu. A-p kommunimi inissisimanerata sunniutaa oqaaseqaatinni imm. 4.2.3-mi sukumiinerusumik isummerfigaara, oqaaseqaatillu sorraassusia pillugu apeqqut immikkoortumi 4.2.5-imi allaseralugu.

Kommuneqarfik Sermersoorli qulaani oqaaseqaatimini A isornartorsiumminik kommunip iluani saqqummiussinissaminut pisussaaffeqartoq imaluunniit kommunip paasinninnera unaaginnarnerusoq tamanna naleqqunnerpaasimassagaluartoq isumaqarnerusoq paasilluarsinnaanngilara. Uangali paasinninnera unaavoq A-mik assuarinninneq immi imatut paasineqassasoq, tassalu kommunip A nalunaarfigigaa kommunip aturfii pillugit tamanut ammasumik ataatsimut oqaaseqaateqassanngitsoq. Tamanna kommunip suliamut atatillugu oqaloqatiginninneq A-p assuarineqarnera sioqqullugu pisoq pillugu imaqarniliaanit ikorfartorneqarpoq.

Uanga erseqqissumik paasinninnera unaavoq pisortani atorfeqartitaasut kiffaanngissuseqarlutik oqaaseqaateqarsinnaatitaanerat pillugu malittarisassatigut aalajangersarneqartoq kommuni A-mut taamatut piumasaqaateqarsinnaanngitsoq.

Taamaattumik isumaqarpunga Kommuneqarfik Sermersuup assuarinninnermi malittarisassanik A-p kommunimi aturfinnut siunnersortitut kiffaanngissuseqarluni oqaaseqaateqarsinnaatitaaneranut ataatsimut atuuttunik kukkusorujussuarmik paasinninneq taamaalilluni takutikkaa.

4.2.5. Oqaaseqaatip sorraassusia

Justitsministereqarfiup pisortani atorfeqartitaasut kiffaanngissuseqarlutik oqaaseqaateqarsinnaatitaanerat pillugu ilitsersuusiani oqaatigineqarpoq atorfeqartitaasut suliffimmi pissutsit pillugit sorraappallaanngitsunik oqaaseqaateqartassasut pisortani sulisitsisup piumasaqaatigisinnaagaa.

Kommuneqarfik Sermersuup assuarinnissummi oqaatigaa A-p oqaaseqaataa "mitallerpalaartorujussuusoq quiassuarpalaartorujussuullunilu". Taamaattumillu A-p kiffaanngissuseqarluni oqaaseqaateqarsinnaatitaanerminut killis-sarititaasut qaangersimagai kommuni isumaqartoq assuarinnissummit erseqqissumik ersinngilaq.

Isuma taanna Kommuneqarfik Sermersuup uannut oqaaseqaammuni itisilerpaa, tamatumunngalu atatillugu ilaatigut makku oqaatigalugit:

"Akissummi siuliani oqaatigineqartutut A-p kiffaanngissuseqarluni oqaaseqaateqarsinnaatitaanera MIA-mi pisortaqatigiit assortunngilaat, tikkuarluguli oqaatigalugu pisumi matumani A-p "pissutsinik isornarsinnaasunik ilusilersorluagaasumik tikkuannnginnera" pineqartoq. Oqaaseqaat tamatuma saniatigut mitallerpalaartuuvoq quiassuarpalaartuullunilu, tassa nunami taaguutit taakku nalinginnaasuunngiffianni, taamaattumillu oqariartuutaasoq allamut sangusortinneqarsinnaalluni. Taamaalillutik pisortaqatigit aamma tamanna pissutigalugu naliliipput A-p oqaaseqaatai pissutissaqanngitsumik sorraatsumik saqqumertut.

Siunnersorti, nuna tamakkerlugu qitiusumik Namminersorlutik Oqartussani NVL-imi [Nordisk Voksen Læring: unga ilanngussara] ataqatigiissaarisoq Cand. Mag. Kistâra Motzfeldt Vahl qallunaat kalaallilu quianartunik assigiinngitsumik paasinnittaaseqarnerat allaaserisamini "Overgangsvejledning"-ingimik qulequtsikkamini Kalaallit Nunaanni Danmarkimilu ilinniartut siunnersortannut saqqummiussivoq:

"Kalaaliulluni Danmarkimut tikikkaanni quiasaariaaseq allaanerusoq tikinneqartarpoq. Qallunaat quiasaariaasianni tusangiasarineq mitakujunnerlu akuusorujussuupput. Kalaallit ilaannut paatsoornarsinnaasarpoq, soorlu aamma kalaallit illarumatunerujusuat qallunaat ilaannut aamma paatsoortitsisartoq. Taamaattumik quiasaariaatsit assigiinngissuseqarnerat maluginiagassaasarpoq, taamaannerani aamma illua'tungerisap quiasaariaasiata qanoq issusia paasiniaatigalugu." [...]" (Atorfeqarfimmi nutsigaavoq)

Imm. 4.2.2-mi qulaani oqaatigineqartutut pisortani atorfeqartitaasut nammineq imminnut sinnerlutik oqaaseqaateqarunik "ilusilersorluaagasumik saqqummiussissasut" pisortani sulisitsisup piumasaaqatigisinnaangilaa. Aallaqqaasiinermi oqaatigineqartutut oqaaseqaat sorraatsuunersoq naliliinermi apeqqutaaginnarpoq oqaaseqaat sorraatsumik ilusiligaanersoq.

Oqaaseqaat qaqugukkut sorraatsorujussuunersoq apeqquummik killiliiniarneq Folketingip Ombudsmandiata periaasiani immikkut pisimavoq. Suliami Folketingip Ombudsmandiata 2006-imi ukiumoortumik nalunaarutaani issuarneqartumi Ombudsmandi pisortani atorfeqartitaasut mitallernermik quiasuarnermillu atuinissaminut periarfissaat pillugu ilaatigut imatut allappoq:

"Nalinginnaasumik ilimagineqarpoq pisortani atorfeqartitaasooq nammineq suliffigisamini iluani pissutsinik tamanut ammasunik isornartorsiuisooq iliuutsimik sorraappallaartumik atueqqusaanngitsoq. Imaangilarli pisortani atorfeqartitaasooq mitallernermik quiasuarnermilluunniit atuinissaminut mattussaasooq. Indenrigsministereqarfiup Farum Kommunemi sulisoq kommunimi pissutsit pillugit oqalugiareerluni mianersoqquneqartoq pillugu oqaaseqaataa 26. februar 1997-imeersoq tamatumunnga atatillugu innersuussutigaa. Oqalugiaat taanna kejserip atisartaavi pillugit H. C. Andersenip oqaluttualiaa tunngavigalugu suliarineqarsimavoq, taamanilu kommunimi borgmesteriusooq atorfilittallu qitiusutut nuimanerusut pillugit isornartorsiuterpassuarnik quiasuaataasunik mitalliutaasunillu imaqarluni. Oqalugiaalli taanna pisortani atorfeqartitaasut kiffaangissuseqarlutik oqaaseqaateqarsinnaatitaanerannut killissarititaasunik qaangiinngilaq, taamaattumillu mianersoqqusut Indenrigsministereqarfiup inatsisinik unioqqutitsisuusutut isigaa, tak. Indenrigsministereqarfiup kommunimi pissutsit pillugit aalajangiinerini oqaaseqaataanilu 1997-imeersuni quppernerit 18 tullialu. Ilimagisariaqarpoq (A)-p saqqummiussaani mitallernermik quiasuarnermillu atueq pisortani atorfeqartitaasut kiffaangissuseqarlutik oqaaseqaateqarsinnaatitaanerat pillugu malittarisassanik unioqqutitsinerunngitsoq." (Atorfeqarfimmi nutsigaavoq)

Suliami 2016-37-mi Folketingip Ombudsmandiata nittartagaani atuarneqarsinnaasumi Ombudsmandi isumaqarpoq ilinniarnertuunngorniarfimmi ilinniartitsisoq Folketingip aningaasaqarnermut ataatsimiititaliaanut e-mailimi atuarfiup pisortaqtigiivinik isornartorsiuinissaminut pisinnaatitaasimasooq. Taassuma atuarfik e-mailimi tassani "umiarsuaq kiviartortoq"-mik aamma taavaa. Folketingip Ombudsmandia suliaq taanna pillugu oqaaseqaammimi ilaatigut imatut allappoq:

“Tamatumunnga atatillugu oqaatigaara uanga paasinninnera unaasoq pisortani atorfeqartitaasut nammineq suliffimminni suliassaqarfimminniluunniit pissutsit pillugit oqallinnermi peqataanissaminnut periarfissaqarnerisa manna aamma nassatarigaat, tassalu taakku – innuttaasunut allanut naligititaallutik – soorlu sakkortuumik assortuerpalaartumillu oqaaseqaateqarsinnaasariaqartut, oqaaseqaatimik erseqqissumik eqqunngitsuunnginnissaat sorraappallaannginnissaalluunniit isumagiinnarunikku.” (Atorfeqarfimmi nutsigaa-voq)

Folketingip Ombudsmandia tamanna tunngavigalugu isumaqarpoq ilinniar-nertuungorniarfimmi ilinniartitsisup e-mailia killissarititaasut pisortani suli-sitsisup atorfeqartitaminit akuerisariaqagaasa iluanniinnera erseqqittoq.

Folketingip Ombudsmandiata oqaaseqaatip qaqugukkut sorraappallaarnera-nut killissarititaasunik paasinninnera ilalerpara. Ataatsimut isiginnillunga ta-manna tunngavigalugu paasinninnera unaavoq A-p oqaaseqaataa – imarisa-migut oqaasertaligaanermigulluunniit – ima sorraatsiginngitsoq Kommune-qarfik Sermersuumi atuarfinnut siunnersortitut kiffaanngissuseqarluni oqaaseqaateqarsinnaatitaanermi killissarititaasunik qaangiisimalluni.

Taamaalillunga qallunaatut oqaatsinik ironimik aamma sarkasmemik atui-neq immini oqaaseqaat sorraappallaarnerisut inatsiseqartitsinikkut naliliiner-mi Kalaallit Nunaanni pissutsit immikkut ittut sunniuteqartut, taamaalillutillu pisortani atorfeqartitaasut kiffaanngissuseqarlutik oqaaseqaateqarsinnaati-taanerannut killissarititaasut avataanniittut Kommuneqarfik Sermersuup i-sumaqarnera ilalersinnaanngilara.

4.2.6. Oqaaseqaatip inatsisinik unioqqutitsisuunnginnera pillugu eqikkaaneq

A-p oqaaseqaammik saqqummiussinerata ajornartorsiutaaneranik Kommu-neqarfik Sermersuup paasinninnera ilalersinnaanngilara.

Taamaalilluni ataatsimut isiginnillunga paasinninnera unaavoq A-p oqaase-qaataa oqaaseqaataasoq inatsisinik unioqqutitsisuunngitsoq, Kommuneqar-

fik Sermersuumi atuarfinnut siunnersortitut kiffaanngissuseqarluni oqaaseqaateqarsinnaatitaaneranut killissarititaasut iluanniinnera erseqqissoq.

Taamaattumik Kommuneqarfik Sermersuup tungaanit A-mut nanertuutaasumik qisuariaateqarneq taamaallaat oqaaseqaatip sunniutaata nassatarisai tunngavigalugit pisinnaavoq. Tamanna immikkoortumi tulliuttumi isummerfigaara.

4.3. Oqaaseqaatip nassatarisaasa sunniutaat

Nassatarisat sunniutaat aalajangersimasut, soorlu suleqatigiinnermi ajornartorsiutit inatsisinik unioqqutitsisuunngitsumik oqaaseqaateqarnerup pilersitai – Justitsministereqarfiup pisortani atorfeqartitaasut kiffaanngissuseqarlu tik oqaaseqaateqarsinnaatitaanerat pillugu ilitsersuusiani oqaatigineqartut – pisortani sulisitsisup aqutsinermi nanertuutaasumik qisuariaatinik atuineranut tunngaviusinnaapput. Kommuneqarfik Sermersooq imatut paasivara A-p oqaaseqaataata sunniutituaa pineqartoq tassaasoq kommunip paasinninnera unaasoq A oqaaseqaammik saqqummiussinermi kingornatigut atorfimminut naapertuuttumik ataqqinassuseqarnissamik tatiginassuseqarnissamillu piumasaqaammik eqqortitsuunnaartoq. Atorfeqartitaasup atorfimmut naapertuuttumik ataqqinassuseqarnissaanik tatiginassuseqarnissaanillu piumasaqaat taanna "decorumkrav"-imik taaneqartarpoq.

Taamaalilluni Kommuneqarfik Sermersuup assuarinnissummut naggasiutitut oqaatigaa atorfeqartitaasup atorfimmut naapertuuttumik ataqqinassuseqarnissaanik tatiginassuseqarnissaanillu tjenestemandit pillugit inatsimmi piumasaqaat A-p eqqortittussaagaa. Atorfimmut naapertuuttumik ataqqinassuseqarnissamik tatiginassuseqarnissamillu piumasaqaat A-p unioqqutissimagaa kommuni isumaqarnersoq assuarinnissummi oqaatigineqanngilaq, isumali taanna kommunip kingusinnerusukkut uannut oqaaseqaammimi itisilersimavaa:

"Pisortaqatigiit manna aammattaaq pingaartillugu isiginiarpaat, tassalu A-p atorfiata qitiusumik inissisimanera pisortaqatigiinnut sammititaasumik siunnersortitut, Atuarfinnillu I-

ngerlatsivimmi akisussaasutut ataqatigiissaarisuunera kiisalu taassuma siusinnerusukkut oqaatigineqartut avataani suleqatigisartakkanut toqqaannartumik attaveqarfiginnittartuunera. Taamaattumik pisortaqatigiit naliliipput A oqaaseqaatiminik saqqummiussinermigut atorfirmut naapertuuttumik ataqqinassuseqarnissamik tatiginassuseqarnissamillu tjenestemandit pillugit inatsimmi § 12-imi piumasaqaataasumik unioqqutitsilluni iliuseqarsimasoq, tassami A taamani tjenestemandit atorfegartitaammat, tak. 13. august 2012 aallernerfigalugu atorfinitsitsineq pillugu allakkat 14. marts 2014-imi ullulernerqarsimasut. [...] (Atorfegarfimmi nutsigaavoq)

Atorfimmut naapertuuttumik ataqqinassuseqarnissamik tatiginassuseqarnissamillu piumasaqaat Kalaallit Nunaanni Namminersornerullutik Oqartussani kommuninilu tjenestemandit pillugit inatsimmi nr. 21-mi, 18. december 2003-meersumi ilaatigut § 12-ikkut aalajangersarneqarpoq, tassanngalu makku erserput:

“§ 12. Malittarisassat atorfirmut atuuttut tjenestemandip peqqusersuilluni malissavai, kiisalu atorfirmut naapertuuttumik ataqqinassuseqarnissamik tatigineqarnissamillu piumasaqaataasunik eqqortitsisinnaanini sulinermini sulinermilu avataani takutissallugit.”

Atorfimmut naapertuuttumik ataqqinassuseqarnissamik tatiginassuseqarnissamillu piumasaqaat pisuni pisortani atorfeqartitaasup pillarneqaataasinnaasunik iliuseqarfigisimasaani atorneqarajuttarpoq, aammali iliuitsit allat piumasaqaatip sumiginnarneqarneranik nassataqarsinnaapput. Nalinginnaasumik ilimagineqarpoq iliuitsit nalinginnaasumik ileqqorissaarnermut assortuuttut atorfirmut naapertuuttumik ataqqinassuseqarnissamik tatiginassuseqarnissamillu piumasaqaammik unioqqutitsisuujaannartanngitsut, isumaliutersuutilli ileqqorissaarnermut tunngasut pisuni aalajangersimasuni sunniuteqarsinnaasut.

Karsten Revsbechip atuakkiaani “Forvaltningspersonalet”-mi, 2012-imi pingajusaanik naqitertinneqartumi qupperneq 40 kiisalu Oluf Emborgip aamma Peer Schaumburg-Müllerip atuakkiaani “Offentlig arbejdsret”-imi, 2010-mi aappasaanik naqitertinneqartumi qupperneq 329 tamatumunnga atatilugu innersuussutigakka.

Kommuneqarfik Sermersuup pissutsimik taassuminnga naliliinera isumaqatiginngilara. A-p oqaaseqaataata pissusia pillugu isumaliutersuutit oqaaseqaammi matumani siusinnerusukkut oqaatigisakka aallaavigalugit uanga erseqqissumik paasinninnera taamaalilluni unaavoq atorfimmut naapertuuttumik ataqqinassuseqarnissamik tatiginassuseqarnissamillu piumasaqaat pillugu isumaliutersuutit suliami matumani pisariaqanngitsut.

Eqqortussaqaq anguniarlugu oqaatigaara tassani aamma ilaasoq pisortani oqartussaasut – Justitsministereqarfiup pisortani atorfeqartitaasut kiffaangissuseqarlutik oqaaseqaateqarsinnaatitaanerata pillugu ilitsersuusiani oqaatigineqartutut - oqaaseqaatip inatsisinik unioqqutitsisuunngitsup nassaataasa sunniutigisinnaasai isummerfigigaangamikkit pisortani atorfeqartitaasut kiffaangissuseqarlutik oqaaseqaateqarsinnaatitaanerata pingaartutut mianerisassaasoq eqqaamasassammassuk.

5. Eqikkaalluni inerniliineq

Uanga paasinninnera unaavoq A-p oqaaseqaataa inatsisinik unioqqutitsisuunngitsoq, Kommuneqarfik Sermersuumilu atuarfinnut siunnersortitut kiffaangissuseqarluni oqaaseqaateqarsinnaatitaaneranut killissarititaasut iluanniinnera erseqqittoq. Taamaalilluni oqaaseqaat taanna immiini assuarininnermut tunngaviusinnaangilaq.

Kommuneqarfik Sermersooq A-p taassuma oqaaseqaataata kingunerisassai tunngavigalugit assuarinissaanut aammattaaq tunngavissaqanngilaq.

Taamaattumik Kommuneqarfik Sermersuup A taassuma oqaaseqaataata kingunerisaanik assuarisinnaangilaa.

Aammattaaq isumaqarpunga assuarinninneq malittarisassat A-p Kommuneqarfik Sermersuumi atorfeqartitaasutut kiffaangissuseqarluni oqaaseqaateqarsinnaatitaaneranut ataatsimut atuuttut kukkusorujussuarnik paasineqarsimanerannik takutitsisuuosq.

Kommuneqarfik Sermersuup uannut oqaaseqaataa aallaavigalugu suliaq imatut paasivara kommunip isumaa malillugu A-p oqaaseqaataata ilusilersorluagaannginnera kommunip suliamik suliarinninneranut sunniuteqarsimasoq. Uanga paasinninnera unaavog tamatuma manna ilungersunartumik nalorninarsisikkaa, tassalu kommunip suliaq suliamut inatsiseqartitsinikkut sinaakkutaasoq killissaliissutillu suut pisortani atorfeqartitaasut kiffanngissuseqarlutik oqaaseqaateqarsinnaatitaanerannut ataatsimut atuunnerat ilumut eqqortumik paasillugit suliarisimaneraa.

Ataatsimut isiginnillunga isumaqarpunga Kommuneqarfik Sermersuup suliaq malittarisassanik pisortani atorfeqartitaasut kiffaanngissuseqarlutik oqaaseqaateqarsinnaatitaanerannut atuuttunik unioqqutitsilluni suliarisimagaa.

Tamanna isorisarialerujussuartut isigaara.

Inassuteqaatigaara suliaq A-mut tunngasoq Kommuneqarfik Sermersuup oqaaseqaatika isiginiarlugit suliareqqissagaa.

Kommuneqarfik Sermersooq qinnuigaara suliami susoqaqqinnersoq uannut nalunaarutigeqqullugu.

Suliami annertunerusumik kukkussuteqartoqarsimasoq isumaqarama Inatsisartut Inatsisinut Ataatsimiititaliaat aamma Kommuneqarfik Sermersuumi kommunalbestyrelsi Ombudsmandi pillugu inatsimmi § 23 tunngavigalugu tamatuminnga nalunaarfigaakka. Taamaalilluni Ombudsmandi pillugu inatsimmi § 23-kkut aalajangersarneqarpoq annertunerusumik kukkussuteqartoqarsimanissaa imaluunniit sumiginnaasoqarsimanissaa ilimagisariaqartoq Ombudsmandip suliamik misissuinerata takutippagu Ombudsmandi suliaq pillugu Inatsisartut Inatsisinut Ataatsimiititaliaannut tamatumunngalu peqatigitillugu Naalakkersuisunut imaluunniit kommunalbestyrelsimut nalunaaruteqassasoq.

Oqaaseqaat manna oqaaseqaammi pineqartut kikkuussusii ilisarnarunnaar-sillugit nittartakkakut tamanut saqqummiukkumaarpara, 2017-imilu ukiu-moortumik nalunaarutinni ilanngukkumaarlugu.

Inuulluaqqusillunga

Vera Leth

Assilinera ukununnga nassiunneqarpoq:

- Eqqartuussissuserisoq E
- Inatsisartut Inatsisinut Ataatsimiititaliaat, Postboks 1060, 3900 Nuuk
- Kommuneqarfik Sermersooq, Kommunalbestyrelsi, Kuussuaq 2, Postboks 1005, 3900 Nuuk

SULIAP INGERLASIMANERA

A Kommuneqarfik Sermersuumi atuarfinnut siunnersortitut atorfimmi 14. marts 2014-imi tjenestemanditut atorfinitsinneqarpoq, 13. august 2012-imi atuutilersumik. A tamanna sioqqullugu kommunimi ukiuni arlalinni atorfeqartitaareersimavoq.

Danmarkimi atuartitsinermit ministeri Nuummi Sisimiunilu atuarfinnut arlalinnut, matumani Atuarfik Samuel Kleinschmidt Nuummiittoq ilanngullugu eqqarsaatigalugu, pulaarniartoq KNR-ip nittartagaata "Danskit ilinniartitaanermut ministeriat tikeraartoq" qulequtsiullugu saqqummiuppaa. Allaaserisamit ilaatigut makku erserput:

"Nunatsinni atuarfeqarfiit ministerip annerusumik paasisassarsiorfiginiarpai, soorlu Danmarkimi taamaaliortoqareersoq nunatsinni meeqqat atuarfianni ilinniarnertuunngorniarfinilu aaqqissuusseqqittoqarnikuulluni.

- Danmark Kalaallillu Nunaat Naalagaaffeqatigiinnikkut ataqatigiilluarput, kalaallit inuusuttut ilinniagaqarnissaat taamaammat pingaaruteqarpoq. Kalaallit Nunaanni meeqqat atuarfii ilinniarnertuunngorniarfiillu aaqqissuuteqqinneqarnikuupput, ilinniartitaanerup nukittorsarneqarnissaa siunertaalluni, misilittakkanillu Naalagaaffeqatigiinnerup iluani avitseqatigiittoqarsinnaavoq, Ellen Trane Nørby oqarpoq.

Nuummi Atuarfik Samuel Kleinschmidt, Sisimiunilu ilinniarnertuunngorniarfik TECH College Greenland KTI pulaarneqassapput.

Ilinniartitaanermut Naalakkersuisoq Nivi Olsen aamma peqataassaaq."

Nittartakkamik atuisut allaaserisaq pillugu oqaaseqaatitik KNR-ip nittartagaani toqqaannartumik allassinnaavaat. A ullormi allaaserisap saqqummerfi-ani imaattunik oqaaseqaateqarpoq:

"Man henfalder i mild undren over visdommen i, at man vælger at fremvise en af landets ældste og lavest scorende folkeskoler for den danske undervisningsminister?
Er der tale om et departementalt freudiansk slip og underbevist ønske om, få Danmark til at tage uddannelsesområdet tilbage af humanitære årsager. [Efterfulgt af smiley; min bemærkning]"

“Nunami maani atuarfiit pisoqaanersaasa angusakinnerpaaffiusartullu ilaata Danmarkimi atuartitsinermut ministerimut takutissorneqartussatut toqqarneqarnerata silatorpalaassusia tupigilaanngitsuugassaangila?

Naalackersuisoqarfiup “freudiansk slip”-enera pissutigalugu ilinniartitsinermut tunngasut Danmarkimut uterteqqinneqarnissaannik sianiginngisamik kissaateqarneq pineqarpa? [Smiley naggasiullugu; uanga ilanngussara]” (Atorfeqarfimmi nutsigaavoq)

Kommuneqarfik Sermersuup A tamatuma kingunerisaanik suliamut atatillugu 9. september 2016-imi oqaloqatigaa. Oqaloqatigiinneq pillugu imaqarnili- amit makku erserput:

**“Atuarfinnut Immikkoortortaqqarfimmi atuarfinnut siunnersortip suliamut atatil-
lugu oqaloqatigineqarnera pillugu imaqarniliq**

9. september 2016, nal. 14.

Ataatsimiinnermi A-p (A-p) saniatigut peqataapput atuarfeqarnermut pisortaq C (C), eqqartuussissuserisoq E (E) illersuisutut kiisalu sulisoqarnermi siunnersorti D (imaqarnilior- tutut).

C oqarpoq ataatsimiinnermut pissutaasoq tassaasoq KNR-ip nittartagaani A-p oqaaseqaa-
taa, tassuunami Danmarkimi atuartitsinermut ministerip Ilinniartitaanermullu Naalakker-
suisup ASK-mut pulaarniarnerat pillugu piffissap suliffiusup nalaani oqaaseqaateqarmat,
tamatumalu allat qularnaalluinnartumik isumaqalersissinnaallugit suliaminut ilaatillugu o-
qaaseqaateqarsimasoq.

A-p atuarfitta ilaat pillugu oqaaseqaateqarnera atuarfiullu pitsaassuseqarnera pillugu o-
qalliserinninnera akuerineqarsinnaangilaq. Suliaq tamanna kommunip nammineq iluani
pisariaqarpoq. Atuarfimmi sulisut tamanna imminnik suliaminnillu tamanut ammasumik i-
sornartorsiuinertut pissutissaqarluarlutik paasisinnaavaat.

Atuarfitta pitsaassuseqartinneqarnerat oqallisigineqassasoq ingerlatsiviup kissaatigippagu
oqallinneq uagut aqussavarput, kiisalu oqalliffimmik, ilusianik aamma piffissamik/sumiif-
fimmik toqqaanitsinni silatusaarluta pissalluta.

A tamatuma saniatigut mitallerpalaartorujussuullunilu quiassuarpalaartorujussuuvoq, kii-
salu Naalackersuisoqarfik suleqatitta qaninnerpaat ilaat isertuarani isornartorsiorlugu. Su-
lisup taassumatut inissisimasup Naalackersuisoqarfimmik tamanut ammasumik isornar-
torsiuinera akuerineqarsinnaangilaq. Pingaartumillu suliamut atasumik, oqallittarfimmillu
tamanut ammasumi taamaaliornera. Taamaalioqqissanngitsoq C-p naatsorsuutigaa. Qu-

laani eqqartorneqartut kommunip Facebook eqqarsaatigalugu ingerlatseriaasianut tulluanngillat.

A aammattaaq tjenestemandiuvoq, taamaattumillu tjenestemandit pillugit inatsimmi § 10-imi atorfirmut naapertuuttumik ataqqinassuseqartumik tatiginassuseqartumillu pissusilersortussaannermik piumasaqaat eqqortittussaallugu:

"Malittarisassat atorfirmut atuuttut tjenestemandip peqqusersuilluni malissavai, kiisalu atorfirmut naapertuuttumik ataqqinassuseqarnissamik tatigineqarnissamillu piumasaqaataasunik eqqortitsisinaanini sulinermini sulinermilu avataani takutissallugit."

E oqarpoq nammineq eqqartuussissuserisutut A-mut illersuisuulluni taannalu sinnerlugu oqaaseqaateqarluni.

E oqarpoq A-p oqaaseqaataa killissanik qaangiisuunaniluunniit kusanaatsuunngitsoq, taamaattumillu sulinermut atatillugu pineqaatissiisuteqarnissamut pissutissaqalersitsinani.

A-p oqaaseqaataa paasisutissanik tamanit pissarsiarineqarsinnaasunik tunngaveqarpoq, oqaaseqaateqarninilu sumik atorfeqarnini ilanngunnagu atsiorlugu.

Kiffaanngissuseqarluni oqaaseqaateqarsinnaatitaanerup killissaliussat nerutoorujussuit iluanniinera Danmarkimi Kalaallillu Nunaanni eqqartuussuterpassuit uppersarparaat.

Taamaattumik A oqaaseqaateqarnini pissutigalugu mianersoqqussummik tunineqarpat tamatuma Inatsisartut Ombudsmandiannut misilitsinneqarnissaa Kommuneqarfik Sermersuup naatsorsuutigisariaqarpaa.

C oqarpoq ataatsimiinneq manna pillugu imaqarniliortoqartoq, ingerlatsivillu suliami matumani pilertornerpaamik aamma aalajangiiniartoq." (Atorfeqarfimmi nutsigaavoq)

Kommuneqarfik Sermersuup A suliamut atatillugu 6. oktober 2016-imi imaattunik imalimmik assuaraa:

"Suliamut atatillugu assuarinnineq

Piffissap suliffiusup iluani KNR-ip nittartagaatigut oqaaseqaateqarsimavutit, tassanilu Danmarkimi atuartitsinermut ministerip Ilinniartitaanermullu Naalakkersuisup ASK-mut pu-laarnerat pillugu oqaaseqaateqarputit, tamatumalu allat qularnaalluinnartumik isumaqalersissinnaallugit sulianut ilaatillugu oqaaseqaateqarsimasutit.

Atuarfitta ilaat pillugu tamanut ammasumik oqaaseqaateqarnerit atuarfiullu pitsaassuseqarnera pillugu oqalliserinninnerit akuerineqarsinnaanngilaq. Suliaq tamanna kommuniq nammineq iluani pisariaqarpoq. Atuarfimmi sulisut tamanna imminnik suliaminnillu tamanut ammasumik isornartorsiuinertut pissutissaqarlualutik paasisinnaavaat.

Atuarfitta pitsaassuseqartinneqarnerat oqallisigineqassasoq ingerlatsiviup kissaatigippagu oqallinneq uagut aqussavarput, kiisalu oqalliffimmik, ilusianik aamma piffissamik/sumiiffimmik toqqaanitsinni silatusaarluta pissalluta.

Tamatuma saniatigut mitallerpalaartorujussuullutillu quiassuarpalaartorujussuuvutit, kiisalu Naalackersuisoqarfik suleqatitta qaninnerpaat ilaat isertuarnak isornartorsiorlugu. Sulisup ilittut inissisimasup Naalackersuisoqarfimmik tamanut ammasumik isornartorsiui-nera akuerineqarsinnaanngilaq. Pingaartumillu suliamut atasumik, oqallittarfimmilu tamanut ammasumi taamaaliornerit.

Aammattaaq tjenestemandiuvutit, taamaattumillu tjenestemandit pillugit inatsimmi § 12-imi atorfimmut naapertuuttumik ataqqinassuseqartumik tatiginassuseqartumillu pissusilersortussaannermik piumasagaat eqqortittussaallugu:

"Malittarisassat atorfimmut atuuttut tjenestemandip peqqusersuilluni malissavai, kiisalu atorfimmut naapertuuttumik ataqqinassuseqarnissamik tatigineqarnissamillu piumasagaataasunik eqqortitsisinaanini sulinermini sulinermilu avataani takutissallugit."

Pisoq taanna suliamut atatillugu assuarinninnermut tunngaviusoq naliliivunga, siunissamillu taamatut pisoqaqqissanngitsoq matumuuna naatsorsuutigalugu." (Atorfeqarfimmi nutsigaavoq)

Eqqartuussissuserisup E-p assuarinninneq tunuardeqqullugu Kommuneqarfik Sermersuumut allakkatigut 25. oktober 2016-imeersutigut kaammattuutigaa. Allakkanit taakkunannga makku erserput:

"Suliamut atatillugu assuarinninneq – A

A KNR-ip nittartagaani facebookikkut oqaaseqaateqarsimanini pissutigalugu allakkatigut 6. oktober 2016-imeersutigut suliamut atatillugu assuarineqarpoq.

"Suliamut atatillugu assuarinninneq"-mik oqarnek mianersoqqussutaanersoq mianersoqqussutaannginnorsorluunniit nalorninarpoq, tassami ataqatigiinneqarnermi tassani pisimasutut iliuuseqartoqaqqissagaluarpat inatsiseqartitsinikkut sunik kinguneqartitsisoqarnissaa toqqaannartumik oqaatigineqanngimmat.

Tunngaviutinneqarpoq aalajangiineq pineqartoq, taamaattumillu suliassat suliarineqartarnerat pillugu inatsit tunngavigalugu naammagittaalliornissamut periarfissaq pillugu ilitsersuut ilanngunneqarsimasariaqaraluarluni.

Aalajangiinermi erserpoq A-p kommunimi atuarfiit pillugit oqaaseqaateqarnera atuarfiullu pitsaassuseqarneranik oqallisiginninnera atuarfeqarnermut ulluuneranilu neqeroorutitut tunngasuni pisortap akueriumanngikkaa. Aamma oqaatigineqarpoq isornartorsiuisoqas-sappat tamatuma kommunip nammineq iluani pinissaa atuarfeqarnermut ulluuneranilu neqeroorutitut tunngasuni pisortap C-p kissaatigigaa, kiisalu isumaqartoq oqaaseqaateqarneq sulisut isornartorsiorneqarnermittut paasisinnaagaat. Kiisalu oqaatigineqarpoq A-p (Ilinniartitaanermut) Naalakkersuisoqarfimmik isertuarnani isornartorsiuinera atuarfeqarnermut ulluuneranilu neqeroorutitut tunngasuni pisortap C-p isorigaa.

Atuarfeqarnermut ulluuneranilu neqeroorutitut tunngasuni pisortap C-p aalajangiinermi manna aammattaq atortussaattippaa, tassalu atorfimmut naapertuuttumik ataqqinassuseqarnissamik tatiginassuseqarnissamillu piumasaqaat A-p eqqortissagaa, tjenestemandit pillugit inatsimmi § 12-ikkut aalajangersarneqarsimasutut. A-lli piumasaqaat taanna sumiginnarsimaneraa sumiginnarsimannginneraalluunniit atuarfeqarnermut ulluuneranilu neqeroorutitut tunngasuni pisortap C-p aalajangiinermi isummerfiginngilaa.

Ataatsimiinnermi 9. september 2016-imi ingerlanneqartumi atortussaatinneqartutut G-p A-mut sinniisutut isumaa unaavoq oqaaseqaatit pineqartut kiffaanngissuseqarluni oqaaseqaateqarsinnaatitaanerup killissarititaasa iluanniinnerat erseqqittoq.

Pisortani atorfeqartitaasut kiffaanngissuseqarlutik oqaaseqaateqarsinnaatitaanerisa suku-miinerusumik qulaajarneqarnerat eqqarsaatigalugu Justitsministereqarfiup ilitsersuutaa nr. 87, 14. september 2006-imeersoq innersuussutigineqarpoq, taannalu pisortani atorfeqartitaasut kiffaanngissuseqarlutik oqaaseqaateqarsinnaatitaanerat pillugu apeqqummut atatillugu aalajangiinermi 2016-37-mi Danmarkimi Ombudsmandeqarfiup atorsimavaa. Aalajangiinermi tassani atuarneqarsinnaasutut Danmarkimi Ombudsmandi isumaqarpoq paaqqinniffiup/suliffeqarfiup pineqartup sulisunut ilaatigut imatut allalluni pisortani atorfeqartitaasut kiffaanngissuseqarlutik oqaaseqaateqarsinnaatitaanerannik killiliiniarsarinerata immikkut isornartorsiorneqarnissaanut pissutissaqartoq:

“... Kaammattuutigaarpullu illit sulisutut pissutsinik nalornisaqaruit aamma/imaluunniit isorisaqaruit qaninnerpaatut pisortarisat suliffimmiluunniit sinniisooq ornissagit suleqatigiinnerluunnit pillugu ilusiliussarput aqqutigissagit.”

Pisortaqatigiit pisoq taanna pillugu ilassutaasumik tusagassiuutitigut imaattumik oqaaseqaateqarput:

“Pisortaqatigiit ammasumik isornartorsiorneqartarnissaat pingaartuuvoq. Pingaartuuvorli isornartorsiuinerup pisortaqatigiinnut toqqaannartumik ingerlatinneqaqqaartarnissaa. ...”

Pisortaqatigiit iliuserisaannik sulisut tamanut ammasumik oqallinnermi isornartorsiullutik oqaaseqaateqarsinnaatitaanerit annertuutigit killilersugaasoq paaqqinniffiup/suliffeqarfiup ataatsimut isigalugu isumaqalersitsisimanera Ombudsmandip aalajangiinnermini isornartorsiorpaa.

Tunngaviutittariaqarpoq aalajangiineq taanna pisortaqatigiit avammut nalunaaruteqarneranni pissusiviusut eqqarsaatigalugit pingaarnerusutigit A pillugu suliamut assersuunneqarsinnaasoq.

G-p A-mut sinniisutut tamatuma kingornatigit isumaa unaavoq A-p kommunip atuarfii pillugit oqaaseqaataanik atuarfillu pitsaassuseqarnerannik oqallisiginninneranik akuerinnissaminut atuarfeqarnermut ulluuneranilu neqeroorutinut tunngasuni pisortaq C pi-sussaaffeqartoq, A inuinnartut taamaaliorsimappat, suliamilu pineqartumi taamaappoq.

G-p A-mut sinniisutut isumaa aamma unaavoq Kommuneqarfik Sermersuumi sulisut kiffaanngissuseqarlutik oqaaseqaateqarsinnaatitaanerit atuarfeqarnermut ulluuneranilu neqeroorutinut tunngasuni pisortap C-p sulianut tunngassuteqartut tunngavigalugit killilersinnaanngikkaa taamalu suliassaqaarfimmik isornartorsiuineq kommunip nammineq iluani saqqummiunneqassasoq piumasaaqatigisinnaanngikkaa. Tamanna inassuteqaatigineqarsinnaavoq, piumasaaqatigineqarsinnaananili.

Kommuneqarfik Sermersooq matumuuna kaammattorneqarpoq suliamut atatillugu assuarinninnini tunuarfeqqullugu.” (Atorfeqarfimmi nutsigaavoq)

Kommuneqarfik Sermersuup eqqartuussissuserisoq E allakkatigit 1. november 2016-imi akivaa. Allakkanit taakkunannga ilaatigit makku erserput:

“Pineqartoq: Allakkassinnut 1203215-inik normoqartunut 25.10.2016-imi ullulernerqarsimasunut akissutitut allakkat

Atuarfinnut siunnersortip A-p assuarineqarnera tunuarfeqqullugu eqqartuussissuserisup E-p eqqartuussissuserisoqarfiata piumasaaqateqarluni allagai Kommuneqarfik Sermersuup 25. oktober 2016-imi tiguai. Atuarfeqarnermut ulluuneranilu neqeroorutinut tunngasuni pisortap C-p atuarfinnut siunnersorti A suliamut atatillugu 9. september 2016-imi oqaloqatigaa, atuarfinnullu siunnersorti suliamut atatillugu 6. oktober 2016-imi assuarineqarluni. Atuarfeqarnermut ulluuneranilu neqeroorutinut tunngasuni pisortap suliamut atatillugu

assuarinninnermi qitiusoq oqaloqatigiinnermi tassani nassuiarpaa: Atuarfeqarnermut pi-sortap paasinninnera unaasoq KNR-ip nittartagaani oqaaseqaatip pissusia/nipaa mitaller-palaartuullunilu quiassuarpalaartuusoq, tamannalu akuerineqarsinnaanngitsoq.

Assuarinninnermik oqartarnej pillugu

Suliamut atatillugu unioqquitsisoqarsimatillugu, ingerlatsivillu naliliinikkut pineqatissiini-arnani aalajangeruni aqutsinnaatitaaneq tunngavigalugu naliliinikkut mianersoqqusinis-saminut imaluunniit naliliinikkut assuarinninnissaminut periarfissaqarpoq. [Allaqqaarne-qarnerani quppernerup ataani nassuiaasiussa: Karsten Revsbechip atuakkiaani "For-valtningspersonalet."-mi pingajussaanik naqitertinneqartumi quppernerit 86 tullialu.]

Tamanna suliamut atatillugu naliliinikkut assuarinninnerit tjenestemandit pillugit inatsim-mi § 27, imm. 1-imi pineqaatissiinnermik oqartarnej tunngavigalugu pineqaatissiinertut i-sigineqannginnerannik tunngavilersorneqarpoq:

"Atorfimmut tunngasumik unioqquitsinernut pillaatit mianersoqqussut imaluunniit assuarinninneq, akiliisitsineq, taamaattorli qaammammusiata affaanit amerlanerusi-naanngitsunik, suliamut allamut, suliffimmut allamut atorfimmulluunniit allamut nuut-sitsineq, atorfimmi appartitsineq soraarsitsinerluunniit atorneqarsinnaapput."

Aalajangiinnermik oqartarnej pillugu

Tamatuma saniatigut Ombudsmandi pisortani atorfeqartitaasut kiffaanngissuseqarlutik o-qaaseqaateqarsinnaatitaanerit kiisalu aalajangiinnermik oqartarnej pillugit oqaaseqaam-mini 7. maj 2014-imi tamanut saqqummiunneqartumi assuarinninnerit aamma aalajangi-iinnermik oqartarnej pillugit imaattumik allaaserisaqarpoq:

"Ombudsmandip K Kommuni tamatumunnga peqatigitillugu matumani isumaqatigaa, tassalu uparuaanerit pineqartut suliaasat suliarineqartarnerat pillugu inatsit tunngavi-galugu aalajangiinertut isigineqarsinnaanaviannngitsut [Allaqqaarneqarnerani qupperne-rup ataani nassuiaasiussa, uanga erseqqissaanera] taamaattumillu inatsimmi tassani malittarisassat atorneqassanatik. Uparuaanerit [assuarinninnerit, uanga ilanngussara] atorfeqartitaanermi pisinnaatitaaffinnik allanngortitsisuunnginnerat taamaalillutillu a-atorfeqartitaanermut tunngasuni nanertuutaasumik toqqaannartumillu sunniuteqartuun-ginnerat Ombudsmandip tamatumani pingaartillugu isiginiarpaa." [Allaqqaarneqarne-rani quppernerup ataani nassuiaasiussa: http://ombudsmand.gl/nyheder/2014/jnr_-2011-320-0001]

Qulaani taaneqartut Kommuneqarfik Sermersuup isumaqatigai, sulisoqarnerlu pillugu mappersakkami assuarinninnerit pillugit immikkoortoq pisortaqtigii innersuussutigat:

"Assuarinninneq pineqaatissiissutitut sakkukitsutut isigineqarpoq. Pisortaq assuarinnip-pat tamanna pineqartup sumik iluarinninnginneranut takussutissaassaaq. Pisortap ilua-

ringgisaata aaqinneqarnera assuarinninnerup nassatarissavaa. Taamatut pisoqanngippat pisortap suliamut atatillugu pineqaatissiissutit atornialersinnaavai. Assuarinninnermi suut sulisup tungaanit naatsorsuutigineqarnersut erseqqissarneqassaaq. Assuarinninnermi suup pineqarnerata paasineqarnera suullu suliareqqinneqassanersut allakkatigut qulakkeerneqassapput. Assuarinnittoqarsimanerali pillugu allakkiortoqarnissaa pingaartuuvoq." [Allaqqarneqarnerani quppernerup ataani nassuiaasiussa: <https://sermeeraq.sermersooq.gl/da/hr/personalehaandbog/personalesager-og-problematikker/paatale/>]

Assuarinninneq atorfeqartitaanermut tunngasuni pitsaanngitsunik nassataqartussaangikkaluartoq uppersaasarsuisussaaneq pissutigalugu ataatsimiinnissamut aggeqqusissut suliarineqartassaaq, ataatsimiinnerlu pillugu imaqarniliortoqartassalluni, taamaalillutik illua'tungeriit siunissami sunik naatsorsuutiginnittoqarnera eqqarsaatigalugu assigiimmik paasinnissimaniassammata. Pisumi pineqartumi atuarfeqarnermut ulluuneranilu neqerootinut tunngasuni pisortap allakkatigoortitsisussaaneermik kommunip piumasaqaata eqqortissimavaa, oqaloqatigiittoqarsimanagera uppersarsinnaajumallugu. Pisortaqtigiit atuarfennut siunnersortimut A-mut naatsorsuutigisatit ataatsimiinnermi saqqummiuppaat, matumanilu erseqqissarlugu atuarfimmik ingerlatsivimmi sulisut pingaarutilimmik inissimasut A-llu atorfanut assingusunik atorfillit tamanut ammasumik oqallinnermi torersumik pissusilersortariaqartut, Facebookimillu ingerlatseriaaseq malittariaqaraat. Suliami illua'tungiusup isumaanik tusarniaasoqanngilaq, tassami assuarinninnerit suliassat suliarineqartarnerat pillugu inatsimmi aalajangiinermik oqartarneq tunngavigalugu aalajangiinertut isigineqanngimmata, Inatsisartut Ombudsmandiata oqaaseqaataa 7. maj 2014-imeersoq innersuussutigalugu.

Pisortani atorfeqartitaasut kiffaanngissuseqarlutik oqaaseqaateqarsinnaatitaanerat pillugu

Kommuneqarfik Sermersooq sulisoqarneq pillugu mappersakkami kiffaanngissuseqarluni oqaaseqaateqarsinnaatitaaneq nipangiussisussaataanerlu pillugit tunaartarisassaqarpoq, [Allaqqarneqarnerani quppernerup ataani nassuiaasiussa: <https://sermeeraq.sermersooq.gl/da/hr/personalehaandbog/ytringsfrihed-og-tavshedspligt/>], tassanilu allassimavoq pisortani atorfeqartitaagaanni inuiaqatigiinni innuttaasutut allatulli kiffaanngissuseqarluni oqaaseqaateqarsinnaatitaasoqartoq. Suliffigisamulli ilumoorfiginninngitsuliortutut pissusilersornani qanoq oqaaseqaateqartoqarsinnaanera eqqarsaatigalugu killiliissutit immikkut ittut atuupput, tamatumunngalu peqatigitillugu nipangiussisussaataaneq eqqortinneqassalluni. Sulisoqarneq pillugu mappersakkami Justitsministereqarfiup ilitersuutaa nr. 87, 14. september 2006-imeersoq innersuussutigineqarpoq, tassanilu imaattunik allassimasoqarpoq:

"Pisortani atorfeqartitaasutut inuinnartut erseqqissumik oqaaseqaateqarnerini innuttaasunut allanut atuuttut saniatigut killilersuutit ikittuinnaat atuupput. Pisortani atorfeqartitaasut eqqarsaatigalugit immikkut killilersuutit makku atuupput:

- Paasissutissat nipangiusimaneqartussat pillugit oqaaseqaateqaqqusaannginneq.
- Kusanaappallaamik periaaseqaqqusaannginneq.
- Nammineq suliassa qarfigisap iluani pissutsit pingaaruteqartut pillugit paasissutissanik eqqunngitsunik saqqummiusseqqusaannginneq.
- Aalajangiiniarnernut atatillugu pissutsit nammineq suliassa qarfigisamut tunngasut pillugit oqaaseqaateqarnissamut tunuarsimaartussaaneq, pingaartumik qitiusumik inis-sisimagaanni, kiisalu aalajangiisoqannginnerani.

Atugassiissutit/nukissat suliffimmi pissutsinut siunissami annertuumik sunniuteqarsinnaasut pillugit apeqqutit pillugit oqaaseqaateqarnissamut annertuumik kiffaanngissuseqarneq atuuppoq, soorlu sipaarniuteqarnerit eqqarsaatigalugit.

Aallaavik tassaavoq pisortani atorfeqartitaasoq oqaaseqaateqarnermi kingornatigut nammineq imminut sinnerluni oqaaseqaateqarneq pissutigalugu akisussaatinniarneqarsinnaanngitsoq.”

Atuarfinnut siunnersorti nammineq imminut sinnerluni kommuniluunniit sinnerlugu oqaaseqaateqarsimanersoq takuneqarsinnaanngilaq, taamaattumillu nammineq imminut sinnerluni oqaaseqaateqartoq erseqqissumik takuneqarsinnaassasoq tamanullu ammasumik oqallinnermi torerumik pissuseqarnissaq aamma eqqortittariaqaraa kiisalu tjenestemandit pillugit inatsimmi atorfimmut naapertuuttumik ataqqinassuseqarnissamik tatiginassuseqarnissamillu piumasaqaat § 12-ikkut aalajangersarneqartoq eqqortissagaa atuarfeqarnermut ulluuneranilu neqeroorutinut tunngasuni pisortap pineqartumut erseqqissarniarpa. KNR-ip nittartagaani oqaaseqaataa imaappoq:

“Man henfalder i mild undren over visdommen i, at man vælger at fremvise en af landets ældste og lavest scorende folkeskoler for den danske undervisningsminister? Er der tale om et departementalt freudiansk slip og underbevist ønske om, få Danmark til at tage uddannelsesområdet tilbage af humanitære årsager.”

“Nunami maani atuariit pisoqaanersaasa angusakinnerpaaffiusartullu ilaata Danmarkimi atuartitsinermut ministerimut takutissorneqartussatut toqqarneqarnerata silatorpalaassusia tupigilaanngitsuugassaanngila?
Naalakkersuisoqarfiup “freudiansk slip”-ertera pissutigalugu ilinniartitsinermut tunngasut Danmarkimut uterteqqinneqarnissaannik sianiginngisamik kissaateqarneq pineqarpa?”

Suliffik pillugu oqaaseqaat pissutigalugu oqaaseqaatillu pissusia/nipaa mitallerpalaarlunilu quiassuarpalaartuummat oqaaseqaatip pissusia/nipaa kusanaappallaartuussanngitsoq atuariillu pitsaassuseqarnerat pillugu apeqqummik oqalliserinninneq eqqarsaatigalugu pisortaqatigiit paasinninnerat unaasoq naliliineq kommunip nammineq iluani pisariaqartoq atuarfeqarnermut ulluuneranilu neqeroorutinut tunngasuni pisortap erseqqissarsimavaa,

tassami A sulisutut qitiusumik inissisimasuummat, atuarfimmi oqaaseqaammi pineqartorpiami pisortaqatigiinnut siunnersortitut.

Facebook inuillu attaveqaatigisartagaat allat eqqarsaatigalugit ingerlatseriaaseq pillugu

Atorfeqartitaasut inuit attaveqaatigisartagaannik Kommuneqarfik Sermersuumi atuineranut aallaavik Facebook eqqarsaatigalugu ingerlatseriaatsimi allanneqarsimavoq [Allaqaarneqarnerani quppernerup ataani nassuiaasiussa: <https://sermeeraq.sermersooq.-gl/wp-content/uploads/2016/01/Facebook-politik-kommuneqarfik-sermersooq-DK.pdf>], taannalu qullersaqarfimmit aamma HSU-mit 17. september 2014-imi akuerineqarsimavoq, tassanilu imaattunik allassimasoqarpoq:

“Immikkoortoq 1: Kommuneqarfik Sermersuup atorfeqartitaasut Facebookimut inuilluunniit attaveqaatigisartagaannut allanut suliffiup nalaani sulinermut atatillugu isersinnaatippai, Facebookimilli namminerisanut tunngasumik atuineq sapinngisamik anertunerpaamik killilersimaarneqassalluni, soorlu oqarasuaatinik internetsimillu atuineq taamaattoq.

Immikkoortoq 3: Suliffiit pillugu qanoq allannerit isumaliutersuutigeqqissaaruk – sulisutut imaluunniit inuinnartut allakkaangavit.

Tunaartarisassatsialak: Facebookikkut tamanut saqqummiussineq atuartartut allagaannik allannertut ippoq – allatatit illit ikinngutinnuinnarluunniit ingerlatikkaluarukkit. Atuartup qanoq inissisimallutit oqaaseqaateqarnerit takujuminaatsissinnaavaa, suliffinnullu sinniisutut oqaaseqaateqartutut imaaliallaannaq isigineqarsinnaallutit.”

Facebook eqqarsaatigalugu ingerlatseriaatsip ataaniittoq: “Suliffimmi Facebook pillugu siunnersuutitsialaat” ataanni imaattunik allassimasoqarpoq:

“Netsimi qanoq allannerit mianeriuk. Oqaasertalersuinerit mianeriuk. Tunngaveqanngitsumik pasillinaveersaarit assigiinngisitsinaveersaarilluunniit. Suliffiit pillugu sunik allannerit eqqarsaatigilluaruk.”

Pisumi pineqartumi immikkoortoq 3 aamma “siunnersuutitsialaat” pingaaruteqarput, Kommuneqarfik Sermersuumimi atorfeqartitaasut namminneq imminnut sinnerlutik allannertik eqqaamasariaqarmassuk, soorlu KNR-ip nittartagaannik atuartut oqaaseqaat namminerisatut suliamulluunniit atatillugu tamanut saqqummiunneqarnerisooq takusinnaaniassammassuk. Atuarfeqarnermut ulluuneranilu neqeroorutininut tunngasuni pisortaq naliliivoq kingullertut taaneqartoq erseqqivinnngitsoq, atuarfinnullu siunnersortip oqaaseqaatai KNR-ip nittartagaanni oqaaseqaatinik atuartunit suliamut atatillugu saqqummiunneqarsimasutut isigineqalersinnaalluni. Tamanna pisortaqatigiit atuarfinnut siunnersortimut 9. september 2016-imi oqaloqatigiinnermi erseqqissarniarpaat. Taamaaliortoqarniarpoq atuarfinnut siunnersortip atuarfiup pisortaanut ASK-imut akisussaasumut nittartakkami oqaaseqaataanut akissuteqarsimasumut tassungarpiaq suliatigut siunnersuisuunera aamma isiginiarlut-

gu, aamma atuarfinnut siunnersortip eqqaamasariaqaraa marluullutik suleqatigiinnertik siunissami aamma ingerlaqqittariaqartoq.

Atuarfinnut siunnersortip A-p Kommuneqarfik Sermersuumi ukiorpassuarni atorfeqartitaasimanera isiginiarlugu Facebookimi oqaaseqaatai suliamut atatillugu oqaaseqaatitut imaaliallaannaq isigineqalissapput, taamaattumillu C-p assuarinninnikkut manna pillugu naatsorsuutiginninnini erseqqisarniaannarpaa, tassalu Kommuneqarfik Sermersuup Facebook pillugu ingerlatseriaasia A-p malissagaa, tamanullu ammasumik oqallinnermi torersumik nipeqassasoq, oqaaseqaatinilu nammineq imminut sinnerluni oqaaseqaatigini erseqqissagaa. Siuliani taaneqartut siunissami eqqortinneqassasut pisortaqtigiit naatsorsuutigaat, imaangilarlu atuarfinnut siunnersortip kiffaangissuseqarluni siunissami oqaaseqaateqarsinnaatitaanera killilersorneqassasoq, tak. Ombudsmandip oqaaseqaataa 7. maj 2014-imeersoq:

“Suliami matumani uanga paasinninnera unaavoq uparuaanerit [assuarinninnerit, uanga ilanngussara] tassaaginnartut siunissami atorfeqartitaanermut tunngasut qanoq isumagineqarnissaannik aqutsisoqarfimmit ulluunerani paaqqinniiffiit pisortaannut pingasunut taakkununga erseqqissaanerit. Taamaalilluni uparuaanertigut [assuarinninnerit, uanga ilanngussara] taakkua toqqaannartumik kingunerisassaannik aamma aalajangersaasoqarsimanngilaq. Taamaattumik K Kommunip uparuaanerit [assuarinninnerit, uanga ilanngussara] suliasat suliarineqartarnerat pillugu inatsit tunngavigalugu aalajangiinerunnginnerannik paasinninnera pillugu isornartorsiorsinnaangilara. Taamaalilluni tamatuma kingunera tassaavoq uparuaanermi [assuarinninnermi, uanga ilanngussara] (inatsimmi innarlitsaaliinermik qulakkeerinninneq pillugu) aalajangersakkat isiginiarneqartussaanginnerat.”

Taamaalilluni eqqartuussissuserisup E-p aamma G-p suliamut atatillugu 6. oktober 2016-imi assuarinninnerup tunuartinneqarnissaanik piunasaqaataat tamanna tunngavigalugu itigartinneqarpoq, pineqartormi tassaaginnarmat naliliinikkut assuarinninneq aamma atuarfinnut siunnersortip Tunngaviumik Inatsisikkut illersugaasumik kiffaangissuseqarluni oqaaseqaateqarsinnaatitaaneranik aamma suliasat suliarineqartarnerat pillugu inatsit tunngavigalugu suliami illua'tungiusup isumaanik tusarniaasarneq pillugu malittarisassanik atuarfeqarnermut ulluuneranilu neqeroorutunut tunngasuni pisortap sumiginnaasimannginnera, tassami assuarinninneq suliasat suliarineqartarnerat pillugu inatsimmi aalajangiinermik oqartarnek tunngavigalugu aalajangiinerunngimmat.” (Atorfeqarfimmi nutsigaavoq)

Eqqartuussissuserisoq E tamatuma kingornatigut uannut e-mailikkut 26. januar 2017-imeersukkut ilanngussartalikkut naammagittaalliorpoq. Naammagittaalliummit tassannga ilaatigut makku erseput:

"A-p sulinermut atatillugu assuarineqarnera pillugu naammagittaalliut

Kommuneqarfik Sermersuup A 6. oktober 2016-imi sulinermut atatillugu assuarisimavaa, KNR-ip nittartagaatigut oqaaseqaat pissutigalugu, taannalu Danmarkimi atuartitsinermit ministerip Atuarfik Samuel Kleinschmidtumut Nuummiittumut pulaarneranut atatillugu i-maattunik oqaaseqaateqarsimalluni:

"Man henfalder i mild undren over visdommen i, at man vælger at fremvise en af landets ældste og lavest scorende folkeskoler for den danske undervisningsminister? Er der tale om et departementalt freudiansk slip og underbevist ønske om, få Danmark til at tage uddannelsesområdet tilbage af humanitære årsager."

"Nunami maani atuariit pisoqaanersaasa angusakinnerpaaffiusartullu ilaata Danmarkimi atuartitsinermit ministerimut takutissorneqartussatut toqqarneqarnerata silatorpa-laassusia tupigilaanngitsuugassaangila?

Naalakkersuisoqarfiup "freudiansk slip"-enera pissutigalugu ilinniartitsinermit tunngasut Danmarkimut uterteqqinneqarnissaannik sianiginngisamik kissaateqarneq pineqarpa?"

Ministerip tikeraarnera Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmit aaqqissuunneqartoq pineqarpoq, Danmarkimilu ministeri taanna taamani Ilinniartitaanermut Naalakkersuisumit Nivi Olsenimit ingjallorneqarpoq.

A-p sumi sulinera allagarsiussamit erseqqivinngilaq, allagarsiussarlu taanna suliamut tunngasuunani inummut namminermit tunngalluinnartutut isigisariaqarpoq.

Suliamut atatillugu assuarinninnerup tunuartinneqarnissaa G-p saaffiginissutikkut 25. oktober 2016-imeersukut piumasaqaatigaa, tamannali Kommuneqarfik Sermersuumit allakkatigut 1. november 2016-imeersutigut itigartinneqarpoq.

Makku Inatsisartut Ombudsmandiannut atortussaatinneqarput:

- A-p inuinnartut oqaaseqaateqarsimanera erseqqittoq
- Oqaaseqaat kusanaatsuunngitsoq
- Oqaaseqaammi pissusiviusut eqqortuusut
- A Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisoqarfimmi atorfeqartitaasuunngitsoq
- Oqaaseqaat nammineq sulisitsisorisamut – Kommuneqarfik Sermersuumut – suk-kulluunniit ilumoorfiginninngitsuunngitsoq

- Oqaaseqaat A-p pisortani atorfeqartitaasut kiffaangissuseqarluni oqaaseqaateqarsinnaatitaanerata inatsisinik unioqputitsisuunngitsup killissarititaasa iluanniittoq, taamaattumillu atorfinitsitsisarneq pillugu inatsiseqartitsineq tunngavigalugu pineqaa-tissiissutigineqarsinnaanani.

Oqaatigineqassaaq Kommuneqarfik Sermersuup allakkamini 1. november 2016-imeersuni Inatsisartut Ombudsmandiata 2014-imi aalajangiinera innersuussutigisimagaa – maanili aalajangiisuusumik allaassutaasoq tassaavoq aalajangiinermi 2014-imeersumi suliamut atatilugu oqaaseqaateqarsimanerup pineqarnera, suliamili maani taamaattoqangilluinnarluni, naak Kommuneqarfik Sermersooq apeqqut taanna pillugu nalornilersitsiniarsarigaluartoq, oqaatigineqarmammi “atuarfinnut siunnersorti nammineq sinnerluni imaluunniit kommuni sinnerlugu oqaaseqaateqarsimanersoq takuneqarsinnaangitsoq”. Allagarsiuussami Kommuneqarfik Sermersuup taaneqarsimanngilluinnarnera isiginarlugu apeqqut taanna pillugu nalornilersitsiniarneq ingasaassinerusorinarpoq, tamatumali aalajangiivigineqar-nissaa Inatsisartut Ombudsmandiannut matumuuna isumagisassanngortinneqarpoq.

[...]” (Atorfeqarfinmi nutsigaavoq)

Naammagittaalliuttip qulaani taaneqartup assilinera ilanngussartaalu Kom-muneqarfik Sermersuumut allakkatigut 10. februar 2017-imeersutigut nas-siuppakka. Kommuni qinnuigaara suliami amerlanerusunik allagaateqarpat kommunillu iluani tassunga tunngasunik malittarisassaqarpat taakku uannut nassiateqqullugit. Tamatuma saniatigut kommunimut ilaatigut imatut allap-punga:

“[...]

2. Suliamik killissaliigallarneq

Taamaalilluni suliap uannut massakkut paasissutissiissutigineqarnera imaappoq tunngavi-usumik manna ajornartorsiutaasoq, tassalu Kommuneqarfik Sermersooq pisortani atorfe-qartitaasut kiffaangissuseqarlutik oqaaseqaateqarsinnaatitaanerata pillugu malittarisassat tunngavigalugit iliuuseqarsimanersoq.

Pisortani atorfeqartitaasut kiffaangissuseqarlutik oqaaseqaateqarsinnaatitaanerata pillugu malittarisassat Justitsministereqarfiup pisortani atorfeqartitaasut kiffaangissuseqarlutik oqaaseqaateqarsinnaatitaanerata pillugu ilitsersuutaani nr. 10062-imi, 28. oktober 2016-i-meersumi (matuma kingornatigut ilitsersuummik taaneqartartussami) Justitsministere-qarfiup qulequtaq taanna pillugu ilitsersuusuaata 2006-imeersup (ilitsersuutimi nr. 87-imi, 14. september 2006-imeersumi) oqaasertalersugaanermigut paasiuminarsagaasumi ilaati-gut allaaserineqarsimapput.

Uanga paasinninnera unaavoq ilitsersuut taanna suliassaqarfimmi tassani inatsiseqartitsinikkut atuuttunik eqqortunik allaaserinnittuusoq, aamma piffissami A-p oqaaseqaammunik saqqummiussinerata nalaani. Taamaattumik Kommuneqarfik Sermersuumut apeqqutikka tulliuttuni takuneqarsinnaasut ilitsersuummi tassani periaatsimik atorineqartumik aallaaveqarput.

Ilitsersuutip assilinera ilisimatitsissutitut ilanngullugu nassiuppara.

3. Ombudsmandip apeqqutai

Kommuneqarfik Sermersooq qinnuigaara suliaq pillugu oqaaseqaateqaqqullugu. Kommuni qinnuigaara assuarinninneq pisortani atorfeqartitaasut kiffaanngissuseqarlutik oqaaseqaateqarsinnaatitaanerata pillugu malittarisassanut naapertuuttuunersoq oqaaseqaammuni isummerfigeqqullugu.

Kommuni tamatumunnga atatillugu qinnuigaara immikkoortut tulliuttuni taaneqartut isummerfigeqqullugit.

3.1. A imminut sinnerluni ilumut oqaaseqaateqarsimanersoq paasissutissani tigusanni arlaleriarluni eqqaaneqarpoq.

Soorlu assuarinnilluni allakkanit namminernit erserpoq A-p oqaaseqaatai piffissap suliffiusup nalaani saqqummiunneqarsimammata tamatuma manna nassatarigaa, tassalu oqaaseqaammik atuartut isumaqalersinneqartut oqaaseqaatit taakku atorfeqartitaanermut atatillugu saqqummiunneqartut.

Tamanna pillugu oqaatigaara ilitsersuummi imm. 5-imit ersertoq pisortat suliffeqarfiutaat oqartussaasoq sinnerlugu kia oqaaseqaateqarsinnaanera pillugu malittarisassanik aalajangersaasinnaasoq. Taamaattumik pisortani atorfeqartitaasup kiffaanngissuseqarluni oqaaseqaateqarsinnaatitaaneraniq illersuineq taamaallaat atuutissaaq, pineqartoq nammineq sinnerluni oqaaseqaateqarpat.

Kommuneqarfik Sermersooq tamanna tunngavigalugu qinnuigineqarpoq manna pillugu sukumiinerusumik nassuiaateqaqqullugu, tassalu A-p oqaaseqaataanik atuartut oqaaseqaatit taakku kommunip isumaanut takussutissaasut suna tunngavigalugu isumaqarsinnaanersut.

Kommuneqarfik Sermersooq tamatumunnga atatillugu qinnuigaara A-p atorfeqartitaaneranut tunngasut oqaaseqaatini takuneqarsinnaannginnerat isummerfigeqqullugu.

3.2. Suliaq aammattaaq imatut paasivara A-p Kommuneqarfik Sermersuumi atorfimmi pineqartumi inissisimanera kommunip suliamik naliliiviginninnerani sunniuteqarsimasoq.

Taamaalilluni suliamut atatillugu uparuaanermi oqaatigineqarpoq sulisup A-p atorfiatut it-tumi inissisimasup Ilinniartitaanermut, Kultureqarnermut, Ilageeqarnermut Ilisimatusar-nermullu Naalakkersuisoqarfimmik isornartorsiuinera akuerineqarsinnaanngitsoq.

Kommuneqarfik Sermersuup akissutitut allagaanit aamma erserpoq "atuarfimmik ingerlat-siveqarfimmi nuimasutut atorfeqarlutik sulisut taakkulu assigisannik A-tut atorfeqartut ta-manut ammasumik oqallinnermi pissuserissaartariaqartut Facebookillu ingerlatseriaasianik malinnittariaqartut" A-mut erseqqissarneqarsimasoq.

Tamatumunnga atatillugu oqaatigaara ilitsersuummi imm. 7-imit manna ersertoq, tassalu pisortani atorfeqartitaasut pisuni immikkut ittuni pisortani oqartussaasut iluminni aalaja-ngiiniarneri sulisinnaassuseqarnerilu eqqarsaatigalugit oqaaseqaateqarnissamut tunuarsi-maartassasut. Isiginiagassat taakku atorfeqartitaasup qulequtaq pineqartoq, matumani a-atorfeqartitaasup oqartussaasumi atorfimmigut inissisimanera ilanngullugu eqqarsaatiger-piarlugu, pillugu oqaaseqaateqartariaqannginneranik nassataqarnersut naliliisoqarnissaani pissutsit ilitsersuummi pingaartillugit isiginiarneqarsinnaasutut oqaatigineqartut tamatu-munnga atatillugu innersuussutigaaq.

Kommuneqarfik Sermersooq tamanna tunngavigalugu qinnuigaara manna pillugu nassui-aateqaqqullugu, tassalu A suliffimmini atorfimmigut qanoq inissisimanersoq, aamma pis-sutsit oqaaseqaammuni eqqartorneqartut pillugit aalajangiiniarnermi peqataasimanersoq. Kommuni tamatumunnga atatillugu qinnuigaara A-p oqaaseqaatai nammineq suliasaqar-fianut tunngasuunersut nassuiaqqullugu.

3.3. Suliaq aammattaaq imatut paasivara isornartorsiuineq A-p kommunip iluinnaani saq-qummiutissagaa Kommuneqarfik Sermersuup kissaatigisimagaa.

Taamaalilluni suliamut atatillugu uparuaanermi manna erserpoq: "Atuarfiutitta ilaa pillu-gu tamanut ammasumik oqaaseqaateqarnerit atuarfiullu pitsaassuseqarneranik tamanut oqalliserinninnerit akuerineqarsinnaanngilaq. Suliaq taanna kommunip iluinnaani sammi-neqartariaqarpoq. Atuarfimmi sulisut oqaaseqaatitit imminnik suliaminnillu isornartorsiui-nertut paasisinnaassallugit pissutissaqarluarput".

Pisortani atorfeqartitaasup isornartorsiuinermik taanna suliffiup iluani saqqummiuteqqaar-nagu saqqummiussisinnaatitaanera ilitsersuummi imm. 7-imit ersertoq innersuussutigaa-ra.

Kommuneqarfik Sermersooq tamatumunnga atatillugu qinnuigaara pisuni sorlarni atorfe-qartitaasut isornartorsiuisagunik isornartorsiuinermik tamanut saqqummiussinnginner-minni taassuminnga suliffiup iluani saqqummiussisarnissaat kommunip piumasaqaatigine-raa paasisutissiissutigeeqqullugu.

Kommuneqarfik Sermersooq qinnuigaara taamatut aaqqissuussinermut inatsiseqartitsinikut tunngavigisaq kiisalu A-p oqaaseqaataanik tamanut saqqummiussinermik kommunip akuerineqarsinnaanngitsutut isiginninnera suliami pineqartumi sumik nassataqarsimanersoq pillugit sukumiinerusumik nassuiaateqaqqullugu.

3.4. A-p oqaaseqaataasa nipaata pillugu Kommuneqarfik Sermersooq paasisutissani nassiunneqartuni aammattaaq oqaaseqaateqarpoq.

Taamaalilluni sulinermut atatillugu uparuaanermut erserpoq A-p oqaaseqaatai "assut mi-tallerpalaarlutillu quiassuarpalaartut".

Kommuneqarfik Sermersuup akissutitut allagaanit aamma erserpoq "tamanut ammasumik oqallinnermi ileqqorissaarneq malissagaa" aamma oqaatsit kusanaappallaat atussanngikai A-mut erseqqissarneqarsimasoq.

Ilitersuummi imm. 8-mi oqaatigineqarpoq pisortani atorfeqartitaasut suliffitsik pillugu pissutissaqanngitsumik kusanaatsunik oqaaseqaateqartassanngitsut; Ap oqaaseqaatai pissutissaqanngitsumik kusanaatsunik oqaasertaqartut Kommuneqarfik Sermersooq naliliisimanersoq uannut erseqqarlulluinnarpoq.

Taamaattumik Kommuneqarfik Sermersooq qinnuigaara A-p oqaaseqaatai pissutissaqanngitsumik kusanaatsunik oqaasertaqartut kommuni isumaqarnersoq sukumiinerusumik nassuiaqqullugu.

3.5. Kommuneqarfik Sermersuup ajornartorsiutit uanga paasisattut A-p oqaaseqaataasa nassatarisaanik pilersinnaasut paasisutissani nassiunneqartuni isummerfigai.

Taamaalilluni sulinermut atatillugu uparuaanermut erserpoq A-p Ilinniartitaanermut, Kulturqarnermut, Ilageeqarnermut Ilisimatusarnermullu Naalackersuisoqarfimmik qanimut suleqatigisartakkatut eqqaaneqartumik isornartorsiuinera akuerineqarsinnaanngitsoq.

Kommuneqarfik Sermersuup akissutitut allagaani aammattaaq oqaatigineqarpoq A-p ASK-mi (Atuarfik Samuel Kleinschmidtimi) atuarfiup pisortaanik suleqateqarnera siunissami at-tatiinnarneqassasoq.

Inatsisinik unioqqutitsinani oqaaseqaatip malitsigisatut sunniutaasa – soorlu suleqatigiin-nermi ajornartorsiutit – pisuni immikkut ittuni pisortaqatigiit pineqaatissiinermik atuinis-saannut pissutissaqalersitsinnaanerannik ilitersuummi imm. 10-mi oqaatigineqartut ta-matumunnga atatillugu innersuussutigaakka.

A-p oqaaseqaatai suleqatigiinnermi ajornartorsiutissaqalersitsisimappata allatigulluunniit malitseqarsimappata Kommuneqarfik Sermersooq tamanna pillugu nassuiaateqaqqullugu qinnuigaara.

3.6. Sulinermit atatillugu uparuaanermit aamma Kommuneqarfik Sermersuup akissutitut allagaanit erserpoq A tjenestemandiusoq taamaattumillu sulinermini sulinermilu avataani atorfirmut naapertuuttumik ataqqinassuseqarnissamik tatiginassuseqarnissamillu piumasqaat eqqortittussaallugu.

Kommuneqarfik Sermersuulli suliamik suliarinninnerani sulinermi sulinerullu avataani atorfirmut naapertuuttumik ataqqinassuseqarnissamik tatiginassuseqarnissamillu piumasqaat qanoq sunniuteqarsimanersoq suliap uannut paasissutissartalersorneqarsimanerani uannut erseqqarluppoq, taamaattumillu kommuni qinnuigaara tamanna pillugu nassuiaateqaqqullugu.

3.7. Pissutsit allat, matumani ilitersuummi taaneqartut – soorlu pisortani atorfeqartitaasut namminneq suliassaqaqfirmmik iluanni pissutsit pingaaruteqartut pillugit paasissutissamik eqqunngitsunik saqqummiusseqqusaannginnerat - ilanngullugit eqqarsaatigalugit Kommuneqarfik Sermersuup suliamik suliarinninneranut sunniuteqarsimappata kommuni qinnuigaara tamanna pillugu nassuiaateqaqqullugu.

Kommuneqarfik Sermersuup oqaaseqaataa pissutsit qanoq issusiat apeqqutaatillugu eqqartuussissuserisumut E-mut suliami illua'tungiusup isumaanik tusarniaatitut saqqummiunneqarumaarpoq.

Oqaaseqaat suliassat suliarineqartarnerat pillugu inatsimmi § 19, imm. 2 tunngavigalugu suliami allagaatinik paasissutissiinnermi tamakkiisumik ilaannakortumilluunniit ilaatinneqanngitsoortariaqartoq Kommuneqarfik Sermersooq isumaqarpat kommuni qinnuigaara tamanna pillugu sukumiinerusumik tunngavilersueqqullugu.”

Kommuneqarfik Sermersuup allakkatigut 7. april 2017-imeersutigut ilaatigut imatut akivaanga:

“A-p suliamut atatillugu assuarineqarnera pillugu G-p Ombudsmandimut naam-magittaaliuutaanut akissut, ilissi j. normorsi 2017-320-0002, 10. februar 2017-imi ullulerneqartoq

[...]

Apequt 3.1 pillugu

Apeqquut pillugu: Kommuneqarfik Sermersooq qinnuigineqarpoq A-p oqaaseqaataanik atuartut oqaaseqaatit taakku kommunip isumaanut takussutissaasut suna tunngavigalugu isumaqarsinnaanersut nassuiaqqullugu.

Akissut:

Kommuneqarfik Sermersooq 23.000-ingajannik inoqarpoq, suliffiullu Nuummi 17.600-nik inoqartumi inissisimanagera isiginiarlugu amerlanerpaat imminnut ilisarisisimasariimmata [...] (**ilangussaq 1** takuuk) pisortaqtigiit naliliipput atuarfinnut siunnersortit avataani suleqataasut amerlanersaanit ilisarisisimanagerat.

Oqallinnerlu siaruapallattaqaaq, pingaartumik Facebook aqutigalugu nutaarsiassaqtitsiviit oqallittarfianni oqallinnermi oqaaseqaataagaangamik, pisortaqtigiillu naliliinerattut A-p [A-p, uanga ilanngusasara] oqaaseqaataatut 30. august 2016-imeersutut tulluanngitsutut, mitallerpalaartutut quiassuarpalaartullu isigineqaraangamik. **Ilangussaq 2** takuuk. Kommuneqarfik Sermersuup Facebookimik inuillu attaveqaatigisartagaannik allanik atuneq pillugu ingerlatseriasiani immikkoortumi 3-mi imaattunik allasimasoqarpoq:

“Suliffiit pillugu qanoq allannerit isumaliutersuutigeqqissaaruk – sulisutut imaluunniit inuinnartut allakkaangavit.

Tunaartarisassatsialak: Facebookikkut tamanut saqqummiussineq atuartartut allagaannik allannertut ippoq – allatatit illit ikinngutinnuinnarluunniit ingerlatikkaluarukkit. Atuartup qanoq inissisimallutit oqaaseqaateqarnerit takujuminaatsissinnaavaa, suliffinnullu sinniisutut oqaaseqaateqartutut imaaliiallaannaq isigineqarsinnaallutit. **Ilangussaq 3 takuuk.**”

Ingerlatseriaatsimi tassani sulinnermi Facebookimik atuinernerq pillugu immikkoortumi 3-mi imaattunik allaasimasoqarpoq:

“Netsimi qanoq allannerit mianeriuk. Oqaasertalersuinerit mianeriuk. Tunngaveqanngitsumik pasillinaveersaarit assigiinngisitsinaveersaarilluunniit. Suliffiit pillugu sunik allannerit eqqarsaatigilluaruk.”

A-p atorfiata suunera Facebookimi allatani takuneqarsinnaanngikkaluartoq pisortaqtigiit naliliinerat unaavoq A-p oqaaseqaatai kommunip isumaatut paasineqarsinnaasut paarlaanneqarsinnaasulluunniit, tassami A kommunimi Nuummilu kommunip ingerlatsiviani ilisarisisimanageratuummat. Tamanna matumunnga ataneqarpoq, tassalu Kommuneqarfik Sermersuumi Atuarfinnik Ingerlatsivimmi ukiuni 14,5-ini atorfeqartitaasimammatt, kommunimilu katillugit ukiut arfineq pingajussaanni atorfeqartuulluni. Pisortaqtigiit piffissaq atorfeqarfiusoq atorfeqartitaaneq eqqarsaatigalugu aamma A-p kommunip iluani suliassa-

qarfimmini avataanilu suleqatigineqartartuni suleqatigisartagarpassuaqarnera pingaartillugu isiginiarpaat.

Aammattaaq ilanngussa 4 takuuk, taannalu sulisoqarnermi inatsisilerituup siunner-sortimut suliaq pillugu naliliineranut tunngasuuvuq.

Apeqqut pillugu: Kommuneqarfik Sermersooq tamatumunnga atatillugu qinnuigineqarpoq A-p atorfeqartitaaneranut tunngasut oqaaseqaatini takuneqarsinnaannginnerat isummerfigeqqullugu.

Akissut:

Kommuneqarfik Sermersuup Ombudsmandi isumaqatigaa oqarmat pineqartup atorfiata suussusia Facebookimi oqaaseqaataani 30. august 2016-imeersumi toqqaannartumik takuneqarsinnaanngitsoq. Pisortaqatigiit suliamik missingiussillutik naliliinermanni manna pingaartillugu isiginiarpaat, tassalu A-p Facebookimi allataani oqaaseqaataanilu atorfiata suussusia takuneqarsinnaanngikkaluartoq tamatuma illoqarfimmi Nuuttut angissusilimmi nalinginnaasumik ilisimaneqarnera, pingaartumillu atorfiit sorliit, kikkunnik inuttaqarneri taakkulu sumi atorfeqartitaanerat suleqatigisartakkanit ilisimaneqartoq.

Pisortaqatigiit manna aammattaaq pingaartillugu isiginiarpaat, tassalu A-p atorfiata qitiusumik inissisimaneqarsimik pisortaqatigiinnut sammititaasumik siunnersortitut, Atuarfinnillu Ingerlatsivimmi akisussaasutut ataqatigiissaarisuunera kiisalu taassuma siusinnerusukkut oqaatigineqartut avataani suleqatigisartakkanut toqqaannartumik attaveqarfiginnittartuunera. Taamaattumik pisortaqatigiit naliliippu A oqaaseqaatiminik saqqummiussinermigut atorfimmu naapertuuttumik ataqqinassuseqarnissamik tatiginassuseqarnissamillu tjenestemandit pillugit inatsimmi § 12-imi piumasaaqataasumik unioqqutitsilluni iliuseqarsimasoq, tassami A taamani tjenestemanditut atorfeqartitaammat, tak. 13. august 2012 aallarnerfigalugu atorfinitsitsineq pillugu allakkat 14. marts 2014-imi ullulernerqarsimasut.

Ilanngussa 5 takuuk.

Apeqqut 3.2 pillugu

Apeqqut pillugu: Kommuneqarfik Sermersooq tamanna tunngavigalugu qinnuigaara manna pillugu nassuiaateqaqqullugu, tassalu A suliffimmini atorfimmigut qanoq inissisimaneqarsimik, aamma pissutsit oqaaseqaammimi eqqartorneqartut pillugit aalajangiiniarnermi peqataasimaneqarsimik.

Akissut:

A Kalaallit Nunaanni ilinniartitaanerami aqqissuusseqqinnermik aalajangiiniarnerup ingerlanerani peqataasimangilaq imaluunniit Ilinniartitaanermit, Kultureqarnermit, Ilisimatu-

sarnermut Ilageeqarnermullu Naalackersuisoqarfimmi atorfeqartitaanani, taamaattumillu suliamik suliarinniffiusoq taassuma atorfeqarnermini suliassa qarfigingilaa, siuliani taaneqartoq aalajangiivigineqarmat.

KNR-ip nittartagaani allaaserisaq imaattunik oqaasertaqartoq maani issuarneqarpoq:

“Kalaallit Nunaanni meeqqat atuarfii ilinniarnertuunngorniarfiillu aqqissuuteqqinneqar-nikuupput, ilinniartitaanerup nukittorsarneqarnissaa siunertaalluni, misilittakkanillu Naalagaaffeqatigiinnerup iluani avitseqatigiittoqarsinnaavoq, Ellen Trane Nørby oqar-poq.”

Qulaani issuarneqartut A-p Kommuneqarfik Sermersuumi aalajangiissinnaatitaaffi-nut tunngasuunngilluinnarput, tassami allaaserisami pineqartut tamanik Naalackersuisoqarfiup aalajangiissinnaatitaaffiannut tunngasuummata. Taamaattorli suliassa qarfiup pisortaata manna tunngaviutippaa, tassalu A atuarfinnut tunngasuni pilersaarutit pillugit aalajangi-i-nerni peqataasarsimanini kiisalu Atuarfik Samuel Kleinschmidtimit tassani angusat pillu-git oqaaseqaateqarnini pissutigalugu suliassa qarfinnut tunngasorujussuit, tassalu a-tuarfiit suliaminnik qanoq pitsaanerusumik ingerlatsisinnaanerit pillugu ilitsersuisutut siunnersuisutullu oqaaseqaateqarsimasoq. Meeqqanut, Ilaqutariinnut Atuarfinnullu Ata-at-simiititaliaq immikkoortumut pilersaarussiaq pillugu 10. marts 2014-imi ataatsimiippoq, tassanilu suliap saqqummiunneqarnera A-p suliaraa. **Ilanngussaq 6** takuuk. Tusarniaa-nermut akissutitut allakkat 28. august 2014-imi ullulernerqarsimasut immikkoortumut pi-lersaarussiaq toqqaannartumik attuumassuteqartup suliarineqarneranit erserpoq Kom-muneqarfik Sermersuup tusarniaa-nermut akissummut ilassuteqaqqullugu qinnutigisaq A-mit aamma taamani atorfimmut immikkoortorta qarfiup pisortaanit atsiorneqarsimasoq. **I-lanngussaq 7** takuuk.

KNR-ip nittartagaani allaaserisami 23. marts 2012-imi ullulernerqartumi “ASK-ip iluarsaan-neqarnissani qangalili utaqqilerpaa”-mik qulequtaqartumi ilaatigut imaattunik allassimaso-qarpoq:

“Atuarfik Samuel Kleinschmidtip iluarsaanneqarnissaa Kommuneqarfik Sermersuup kissaataasa pinga-nerpaat ilagaat. Kommuneqarfik Sermersuup kommunalbestyrelsi-ata marlungormat ataatsimiikkami akuersissutigaa kommunip Ineqarnermut, Attave-qatigiinnermut Angallannermullu Naalackersuisoqarfimmut ASK-ip iluarsaanneqarnis-saani kissaatigissagaa.” (**ilannngussaq 8**) takuuk. [Tassunga nassuiaatitut: Linki una tak.: <http://knr.gl/da/nyheder/ask-har-l%C3%A6nge-ventet-p%C3%A5-renovering>].

Aallaaserisaq imatut nangippoq:

“Kommuneqarfik Sermersuumi atuarfinnut immikkoortorta qarfimmil pisortaq F neriuppoq ASK-ip iluarsaanneqarnissaannut aningaasaliissutit Inatsisartut massakkut akuerissagaat.

- Atuarfimmil sanasut kaattarpalunnerat aatsaat tusaalerukku upperilissavara atuarfik iluarsaallugu aallartinneqartoq, F oqarpoq, erseqqissaallunilu Inatsisartut atuarfiup iluarsaanneqarnissaanut aningaasaliinissaminnik ukiuni ikinnerpaamik 10-ni oqaluuserisaqartaraluarput, pivisunngortinneqarsimannngisaannartumik.”

A nammineq atuarfiit pillugit immikkoortunut pilersaarusiamik suliaqarpoq, ilaatigut tamanna toqqaannartumik takuneqarsinnaavoq pikkorissaanissamut piareersaammut 2014-imut immikkoortunut pilersaarummut aningaasanut inatsimmut ilanngussaasumi. **Ilanngusaaq 7** takoqqiguk, qupp. 3-mit 5-imut. Taakku saniatigut nutarterinissamut pilersaarutit unitsinneqarsimanerat takuneqarsinnaavoq illoqarfiit pingaarnersaata pilersaaruserneqarnerani juni 2016-imeersumi, quppernermi 18-imi atuarfiit USK aamma ASK atorunnaarsinneqassasut illoqarfimmilu atuarfimmik nutaamik sanasoqassasoq. **Ilanngusaaq 9** takuuk.

A suliaasaqarfiup pisortaanut C-mut [C-mut, uanga ilanngussara] atuarfiillu pisortaannut toqqaannartumik siunnersuineq isumagisassaralugu atorfeqartitaavoq, tamannalu atorfiata suliaasaasalu allaaserineqarnerannit aamma takuneqarsinnaavoq. **Ilanngusaaq 10** takuuk. Pisortaqatigiit paasinninnerat unaavoq A pisortaqatigiinnik siunnersuinermit sammititaasumik siunnersuisuunermigut aalajangiinerni atuarfinnut toqqaannartumik sunniuteqartuni peqataasartoq. Tamanna immikkoortortamut pilersaarusiamik suliarinneqataasimaneranut aamma ataneqartillugu isigineqassaaq, atuarfiullu pineqartup qanoq issusia angusaqarfiusarneralu pillugit oqaaseqaateqarami nammineq suliaasaqarfini pillugu anner-tuutigut oqaaseqaateqarpoq, tassami atuarfiit pisortaasa ataqatigiinneqarnerani arlalinni pissutsinik qanoq iliorlutik pitsaanerulersitsinnaanerani eqqarsaatigalugu ilitsersuisuugami siunnersuisuugamilu.

A atuarfinni ilinniartitsisutut aamma Kommuneqarfik Sermersuumi Atuarfimmil Ingerlatsivimmi atuarfinnut siunnersortitut sivisuumik atorfeqartitaasimavoq, Nuummi inissisimallunni, kingullermullu taaneqartumut atatillugu atorfinitsinneqarnera pillugu allakkani allasimavoq malittarisassat tjenestemandinut atuuttut aalajangersakkallu atorfimmut tassunga immikkut atuuttut malitassaralugit. Atorfinitsitsineq pillugu allakkat 14. marts 2014-imeersut **ilanngussarlu 5** takoqqikkat. Atorfia suliaalu pillugit allaaserisami “Atuarfinnut immikkoortorta qarfimmil sulisut makku suliaasaat”-mik qulequttap ataani pineqartup akisussaaffia pillugu imaattunik allasimasoqarpoq:

- Atuarfinnut immikkoortorta qarfiup suleqatigisartagai suleqatigalugit nunami tamarmi najukkamilu naalakkersuinikkut anguniakkat eqqortissallugit [Allaqaarneqarnerani quppernerup ataani nassuiaasiussaqaq: Uanga erseqqissaanera.]

- Suliat suliassallu tamaasa pimoorullugit, suliamut attuumassuteqartumik suku-miisumillu suliarissallugit.
- Ataatsimut pisinnaatitaanerit ingerlaavartumik iluarsartuutissallugit.
- Atuarfiup suliassaqarfiata ataatsit arlallilluunniit iluanni immikkut ilisimasassa-nik pissarsissalluni taakkulu aserfallatsaalissallugit.

Allaaserisami oqaaseqaatigisaminut tunngasuni aalajangiiniarnermi peqataasimangikka-luartoq suliassaqarfigisaanit erserpoq atuarfinnut immikkoortorta qarfiup suleqatigisartagai suleqatigalugit nunami tamarmi najukkamilu naalackersuinikkut anguniakkat eqqortissa-gai [...],. **Ilanngusaq 10** takoqqiguk. Pisortaqatigiit paasinninnerat unaavoq oqaaseqa-tigisai kommunimi atorfeqartitaaneranut ataqatigiissinneqarsinnaanngitsuussanngitsut, I-linniartitaanermut, Ilisimatusarnermut Ilageeqarnermullu Naalackersuisoqarfimmik sule-qateqarneq eqqarsaatigalugu inissisimanagera qitiusumiippat, oqaaseqaatip tamat oqallit-tarfianni KNR-ip nittartagaatut Facebookitulli ittuni saqqummiunneqarsimanagera pingaartu-mik eqqarsaatigalugu.

Atorfiup suliassallu allaaserineqarneranni siusinnerusukkut taaneqartumi suleqatigisartak-kat pillugit imaattunik allassimasoqarpoq:

“Avataani suleqatigisartakkat oqartussaasullu allat, suleqatigiiffiit suliniaqatigiiffiillu.
(...)

Siunnersortit suleqatigisartagaat allat tassaapput atuarfeqarfiup pisortaa, pisortap tul-lia, atuarfiit pisortaat (allaqqaarneqarnerani quppernerup ataani nassuiaasiussaq: Ua-nga erseqqissaanera), suliassaqarfimmi suleqatigisat (MISI [Meeqqanut Inuusuttunullu Siunnersuisoqarfik; uanga ilanngussara], atuarfinni aqqutissiuisut, Inerisaavik) atuar-feqarfimmut tunngasut iluani.”

Atuarfiup pisortaa B-p (B-p) oqaaseqaateqarnermigut A akerlilerpaa, Atuarfik Samuel Kleinschmidt illersorlugu. Naak A-p oqaaseqaataata oqaaseqaatip saqqummiunneqareer-nerani B-p A-llu suleqatigiinneranni ajornartorsiutinik kinguneqanngikkaluartoq atuarfin-nut siunnersortip ASK-imik taassumalu pisortaanik “oqaatsit atorlugit saassussinera” pi-sortaqatigiit akuerisinnaanngilaat.

Kia Dollerschellip atuakkiaani “Sociale medier i ansættelsesretten”-imik qulequtaqartumi siullermik naqitertinneqartumi atorfinnik naliliinerit sumiiffinnut qanilluinnartuunerat pillu-gu imaattunik allassimasoqarpoq:

“Najukkami inuiaqatigiiannguani fuldmægtigi nuimasutut akisussaaffilerujussuartut i-maaliallaannaq inissisimalersinnaavoq, illoqarfimmili anginerusumi fuldmægtigi pisor-tani atorfeqartitaanermut tunngasuni ingerlatsivimmi tamatuma pissuseqataanik pigin-naatitaaffeqarsinnaanngitsoq ilimagineqarsinnaavoq.” Tak. Kia Dollerschellip atuakki-

aani "Sociale medier i ansættelsesretten, 2012-imeersumi qup. 42. **Ilanngusaq 11** takuuk.

Aammattaaq atuakkami siuliani taaneqartumi quppernermi tassani allassimavoq atorfeqartitaasut immikkut tatigisaasutut atorfinniittut oqimaannerusumik akisussaaffeqartut, taamaattumillu atorfirmut naapertuuttumik ataqqinassuseqartumik tatiginassuseqartumillu pissusilersornissamik piumasaqaat tamatuma pissuseqataanik sakkortunerusoq. Tamanna matumunnga ataneqartillugu aamma isiginiarneqassaaq, tassalu A taamani tjestemanditut atorfeqartitaasoq, sulinermini sulinerullu avataani pissuserissaarnermik takutitsinissamut immikkut ittunik pisussaaffeqarluni. Pisortaqatigiit naliliipput A annertunerusumik akisussaaffeqartoq, pisortatullu atorfeqanngikkaluarluni aqqissuussaaneq eqqarsaatigalugu – Danmarkimi illoqarfimmi anginerusunik atorfeqartitaanermini pisinnaatitaanermi - Nuummi annertunerusumik pisinnaatitaasoq.

Siunnersorti, Namminersorlutik Oqartussani NVL-imi nuna tamakkerlugu qitiusumik ataqatigiissaarisooq Cand. Mag. Kiståra Motzfeldt Vahl Kalaallit Nunaanni Danmarkimilu najugaqarnerit assigiinngissutaat 2015-imi novemberimi ilinniartitaanerni siunnersortinut saqummiussamini "Overgangsvejledning"-imi imatut allaaseraa:

"Kalaallit Nunaat inukitsuuvoq, taamaattumillu inuppassuit imminnut ilisarisimasarput. Ilaasa kikkut tamarmik ilisarisimaqatigiiffianni najugaqarneq toqqissisimanartippaat. Danmarkimi amerlanerujussuit akornaniittoqalersarpoq, taamaattumillu ilisarisimaneqarnerunani inuusoqalersarluni. Tamanna kalaallit ilinniartut ilaannut sungiunniagasasasarpooq." **Ilanngusaq 12** takuuk.

Inukitsuni najugaqarnerup manna pissusissamisoortumik nassatarisarpaa, tassalu KNR-ip nittartagaani allaaserisat pillugit Facebookimi oqaaseqaatit illoqarfimmi Nuuttut ittumi tusararneqapallattarnerat siammapallattarnerallu, taamaattumillu Kalaallit Nunaanni najugaqarluni soorlu Københavnimi najugaqarluni BT-mi allaaserisaq pillugu oqaaseqaateqarnermit kinaassuseq isertoruminaannerusarpoq. Tamanna inuttussutsumik pissuteqarpoq, Kommuneqarfik Sermersuumi ingerlatsivinni immikkoortortaqaqarfinilu ikittuinnarnik suli-soqarneranut ataneqartumik, Københavnimi kommunimi 45.000-inik sulisoqartumut sanilliullugu. **Ilanngusaq 13** takuuk. [Allaqqaarneqarnerani quppernerup ataani nassuiaasiussa: Liniki una takuuk: <https://medarbejder.kk.dk.>]

Apeqqut 3.3 pillugu

Apeqqut pillugu: Kommuneqarfik Sermersooq tamatumunnga atatillugu qinnuigineqarpoq atorfeqartitaasut isornartorsiussagunik pisuni sorlarni isornartorsiuinermik tamanut saqqummiussinnginnerminni taassuminnga suliffiup iluani saqqummiussisarnissaat kommunip piumasaqaatiginerana paasissutissiissutigequllugu.

Akissut:

Kommuneqarfik Sermersuup ammasuunermik ingerlatseriaasiani quppernermi 4-mi kommunip iluani attaveqaqatigiittarneq pillugu imaattunik allassimasoqarpoq:

“Pisortat sulisullu inuttut toqqarlutik attaveqatigiittarnissaat assut pingaartippaput. Kommunip iluani paasissutissiisarnerup attaveqatigiinnerullu qulakkeerpeqarnissaat pisortat immikkut akisussaaffigaat.”

Ammasuunermik ingerlatseriaatsimi quppernermi 4-mi qullersariaanermi attaveqaqatigiittarneq pillugu imaattunik allassimasoqarpoq:

“Qullersariaanermi attaveqatigiinneq attaveqatigeeriaatsini pingaarnersaavoq, kommunip iluani attaveqatigiinneq eqqarsaatigalugu.

Qullersariaat attaveqatigiinnerat tassaavoq qullersariaanermi paasissutisseeqatigiinneq, pisortanit immikkoortorta qarfinni suliassa qarfiit pisortaannut tassanngaanniillu sulisunut – kiisalu illua tungaanut aqputaa tamaat. Inummiit inummut paasissutissiineq pineqarajuppoq.

Periaatsit allannguinerillu pineqartillugit qullersariaanermi attaveqatigiinneq amerla-soorsuarnut allat aqputit atorlugit attaveqatigiinnermit pingaarnerrujussuarmik inississimavoq. Qullersariaat attaveqaqatigiinnerat tulleriaanermi pingaartinneqarpoq, sulisut Sermersuup takorluugai, anguniagai isumaalu pillugit avatangiisinut ilusilersorluagaasumik tunngavilersorluagaasumillu oqaloqatiginnittarnissaminut pitsaanerpaamik tunngavissalerneqarnissaat siunertaralugu [...]”

Ilanngussaq 14 takuuk.

Kia nutaarsiassaqaqtitsivinnut oqaaseqaateqarsinnaanera sulisullu nutaarsiassaqaqtitsivinnut qaqugukkut oqaaseqaateqarsinnaanerat pillugu ammasuunermik ingerlatseriaatsimi aamma imaattunik allassimasoqarpoq:

“Atorfeqartitaasut tamarmik kommunimi atorfeqartitaasutut misigisatik pillugit oqaaseqarsinnaapput.

Atorfeqartitaasut tamarmik suliaminni pissusiviusut pillugit oqaaseqarsinnaapput. Tunngaviusumik imaappoq inuk suliamik tigummiartausoq tassaasoq pissusiviusut pillugit oqaaseqaateqarnissaminut naleqqunnerpaasoq, tusagassiortulli tunngaviusumik apeqqutaannik kia kommuni sinnerlugu akissuteqartarnissaa pillugu malittarisassanik erseqqinnerusunik aalajangersaanissaq direktørit ataasiakkaat akisussaaffigaat.

Pisut sukkasuumik ingerlagajuttarmata tusagassiuutinut oqaaseqaateqartoqartinnagu suliap immikkoortorta qarfirmi oqaloqatigiissutigineqaqqaartarnissaat kaammattuutigineqarpoq.

Isummat naliliinerillu politikkimut tunngasut politikerinit qullersaqarfimmillu imaluunniit allanit kommuni sinnerlugu oqaaseqaateqartussatut toqqagaasunit saqqummiunneqartassapput [Allaqqaarneqarnerani qupperneq ataan nassuiaasiussaq: Ammassuunermik ingerlatseriaaseq qupp. 6].”

Ammassuunermik ingerlatseriaatsimi inuinnartut oqaaseqaateqarneq pillugu aamma imaattunik allasimasoqarpoq:

”Sulisut tamarmik sunaluunniit pillugu oqaaseqaatigiumasaminnik inuinnartut oqaaseqaateqarsinnaatitaapput. Taamaalioraanni inuinnartut, imaangitsoq kommunip sinnisaatut, oqaaseqaateqarneq erseqqissarneqassaaq. Ataqtigiinneqarnermi sorlermi oqaaseqaateqarneq immikkoortisimaneqarnissaa pingaartuuvoq.

Kommuneqarfik Sermersuumi atorfeqartitaasutut oqaaseqaateqaraanni kommunip sinnisaatut aallaavittut inissimasoqartarpoq, taamaattumillu kommunip isumaanik saqqummiussisoqartussaalluni. Tusagassiuutinut aamma oqaaseqaateqaraanni suliffimmi malittarisassat nalinginnaasut soorunalimi aamma atuuttissapput.

Tassa sulisutut kommunimut pisortarisanullu ilumoorfiginninneq suli atuutissaaq, nipaangiussisussaataanerlu il.il. eqqortinneqassallutik.

Pisortatut atorfeqartitaasut sulisulluunniit qaffasissumik inissimasut, tassalu direktørit, immikkoortorta qarfiit pisortaat, attaveqatigiinnermi sulisut il.il. innuttaasunit kommunitut isigineqarnertik eqqumaffigissavaat. Taamaattumik taakkua oqaaseqaataat kommunimut sunniutilimmik tuttarput. Taamaattumillu sulisut taakku kaammattorneqarput inuiaqatigiit oqallinnerani inuinnartut peqataanertik killilersimaarniaqqullugu.”

Kiffaanngissuseqarluni oqaaseqaateqarsinnaatitaaneq nipaangiussisussaataanerlu pillugit imaattunik kommunip intranetsiani allasimasoqarpoq: **Ilanngussaq 15.** takuuk.

”Pisortani atorfeqartitaasutut inuiaqatigiinnit innuttaasut allat assigalugit kiffaanngissuseqarluni oqaaseqaateqartoqarsinnaavoq. Taamaattorli suliffigisamat ilumoorfiginningsumik pissusilersorani qanoq oqaaseqarsinnaaneq eqqarsaatigalugu killissat immikut ittut atuupput, tamatumunngalu peqatigitillugu nipaangiussisussaataaneq pillugu malittarisassat malinneqassapput.”

Qulaani oqaatigineqartunit ersertutut taamaallaat piumasaqaataavoq kommunip iluani attaveqatigiinneq assut pingaartillugu isiginiarneqassasoq, sulisullu kommunip takorluu-

gai, anguniagai isumaalu eqqarsaatigalugit avatangiisinut ilusilersorluagaasumik tunngavilersorluagaasumillu oqaloqatiginnittarnissaminut pitsaanerpaamik tunngavissalernerqassasut. Sulisup tamanut ammasunik oqaaseqaatini nammineq inuttut kommunilluunniit sinniisaatut saqqummiunnerlugit erseqqissartassagaa tamannalu tamanit takuneqarsinnaassasoq aamma piumasaqaataavoq.

Tamatuma saniatigut aamma piumasaqaataavoq suliat ingerlasut tusagassiuutinit soqutigineqartut oqaloqatigiissutigineqartassasut, tassami isummat naliliinerillu politikkimut tunngasut politikkimik suliaqartunit qullersaqarfimillu saqqummiunneqartarnissaat pi-sortaqatigiit piumanerummassuk.

Tusagassiuutit eqqarsaatigalugit ingerlatseriaatsimit erserpoq sulisoq suliassa qarfiulluunniit pisortaa tusagassiuutinit attaveqarfigineqarpat qullersaqarfik innersuussutigineqartassasoq. Suliassa qarfiit pisortaat pisortarisaminut isumaqatigiissuteqarnermik oqaaseqaateqarsinnaapput. Tusagassiuutit eqqarsaatigalugit periaatsimi qupp. 1-imi immikkoortumi siullermi qulequtaaraq imaattoq ilaavoq: Aqutsinikkut allaffissornermut tunngasunik imalinnik, pisortap pineqartut pillugit oqaaseqaateqarnissaanik piumasaqaateqarfiusunik saaffiginnissutini oqaaseqaatit. **Ilanngussaq 16** takuuk.

Apeqquut pillugu: Kommuneqarfik Sermersooq qinnuigineqarpoq taamatut aqqqissuussi-nermut inatsiseqartitsinikkut tunngavigisaq kiisalu A-p oqaaseqaataanik tamanut saqqummiussinermik kommunip akuerineqarsinnaanngitsutut isiginninnera suliami pineqartumi sumik nassataqarsimanersoq pillugu sukumiinerusumik nassuiaateqaqqullugu.

Akissut:

Inatsiseqartitsinikkut tunngavigisaq "God adfærd i det offentlige"-mi 2007-imeersumiip-
poq, taannalu Kommuneqarfik Sermersuup tigulaariffigisimavaa, intranetsikkullu Ser-
meeqqakkut tamanut saqqummiullugu, "Ytringsfrihed for offentligt ansatte"-mik qulequt-
serlugu. Kiffaanngissuseqarluni oqaaseqaateqarsinnaatitaaneq, nipangiussisussatitaaneq
isornartorsiutinillu saqqummiussineq pillugit kommunip tunaartarisassai tassani allaaseri-
neqarput, imaattunillu allassimasoqarpoq:

"Oqallinneq ammasuunerlu kommunimi sulinermi pissusissamisoortumik ilaasariaqar-
put, tamannalu politikeritta naalakkersuisoqaatigiinneq pillugu isumaqatigiissutaanni
pingaartillugu isiginiarpaat. Taamaattumik pisortaqatigiinnut manna pingaartuuvoq,
tassalu kulturimik suliffeqarfimmi pissutsit pillugit oqalliserinninnissamik soqutiginnin-
nerup inatsisunik unioqqutitsuunngitsutut iluarinartutullu isigineqarfigisaanik pilersitsi-
soqarnissaa. Aalajangiinernik ataqqinninnerup suliffimmut ilumoorfiginninnerinnaan-
ginnera aammali pissutsinik isornartunik ilusilersorluagaasumik tikkuasarnerup sulif-
fimmut ilumoorfiginninnerunera pisortat sulisullu eqqumaffigisariaqarpat. Taamaattu-
mik isumannaallisaanermi suliniaqatigiiffimmik Suleqatigiinnermullu Ataatsimiititalianik

atuisarnissaq pingaartuuvoq, tassami suliniuteqarfiit taakku suleqatigiinnermi paasiisutisiisarnermilu atugassaammaata. (...)"

Kalaallit Nunaanni pisortani atorfeqartitaasut inuiaqatigiinni inuttaasutut allatulli kiffaanngissuseqarluni oqaaseqaateqarsinnaatitaasoqarpoq. Tamanna Tunngaviusumik Inatsimmi § 77-ikkut qulakkeerneqarpoq:

"Kinaluunniit eqqarsaatini naqitatigut, allakkatigut oqalunnermigulluunniit tamanut saqqummiunnissaannut pisinnaatitaavoq, taamaattorli eqqartuussivinnut akisussaaffeqarluni. Saqqummiunniakkanik misissuilluni killiliisarneq allatullu kikkulluunniit isumaannik saqqummiussisinnaveersaernerit qaquguluunniit atulerseqqinneqanngisaannassapput."

Tassa imaappoq innuttaasut tamarmik – aamma pisortani atorfeqartitaasut – suulluunniit oqaatigisinnaagaat – *taamaaliornissamut akuereqqoqqaanngikkaluarlutik* [Allaqqaarnergarnerani quppernerup ataani nassuiaasiussaq: Uanga erseqqissaanera]. Taamatutaaq oqaaseqaateqarniarneq akornuserneqassanngilaq. Kiffaanngissuseqarlunilu oqaaseqaateqarsinnaatitaaneq aamma isumaqarpoq oqaaseqaatigisatit illit nammineq akisussaaffigitit. Qulaani taaneqartut oqaatigineqartutut kommunip intranetsiani "Ytringsfrihed og tavshedspligt"-imik qulequttap ataaniipput. Linki una takuuk: <https://sermeeraq.sermer-sooq.-gl/da/hr/personalehaandbog/ytringsfrihed-og-tavshedspligt/> **Ilanngussaq 17** takuuk.

Taamaalillutik MIA-mi [Meeqqanik, Ilaqutariinnik Atuarfinnillu Ingerlatsivimmi, uanga ilanngussara] pisortaqtigii kiffaanngissuseqarluni oqaaseqaateqarsinnaatitaaneq assortunngilaat, tikkuarluguli oqaatigalugu pisumi matumani A-p "pissutsinik isornarsinnaasunik ilusilersorluagaasumik tikkuanaanera" pineqanngitsoq. Pisortaqtigiiit naliliinerat unaavoq manna akuerineqarsinnaanngitsoq, tassalu A-p atuarfiup pisortaanit suliassaqarfiullu pisortaanut siunnersortitut ilitsersuisutullu atuarfimmik siunnersussallugu akisussaaffigisaminik oqallittarfimmi tamanut ammasumik taama isertuannngitsigisumik isornartorsiunerani. Pisortaqtigiiit manna akuerineqarsinnaanngitsutut isigaat, tassalu A-p oqaaseqaatimini Atuarfik Samuel Kleinschmidtinik nikassaanera, tamannalu pissutigalugu siunnersuineri ilitsersuinermilu tatigineqarneq pilersikkuminaatsorujussuannngortikkaa. Pisortaqtigiiit naliliipput suliffimmi pissuserissaarnermi manna aamma ilaasoq, tassalu isornartorsiuneq ingerlatsiviup atuarfinnut immikkoortortaqarfianut atuarfinnilu pisortaqtigiinnut sammitinneqassasoq, isornartorsiunermi atuarfiup angusai pitsaanngitsut atuarfiulluunniit kusanaallisimanera pineqarpata. Taamaattumik suliassaqarfiup pisortaata paasinninnera unaavoq siuliani taaneqartut qanoq iliorluni pitsaanerulersinneqarsinnaanerit pillugu atuarfiup pisortaanik oqaloqateqalerneq ileqqorissaarnerusoq, inuit attaveqatigiiittarfii nittartakkallu assigiinngitsut aqutiginagit.

Apeqqut 3.4 pillugu

Apeqquut pillugu: Taamaattumik Kommuneqarfik Sermersooq qinnuigineqarpoq A-p oqaaseqaatai pissutissaqanngitsumik kusanaatsunik oqaasertaqartut kommuni isumaqarner-soq sukumiinerusumik nassuiaqqullugu.

Akissut:

Akissummi siuliani oqaatigineqartut A-p kiffaanngissuseqarluni oqaaseqaateqarsinnaati-taanera MIA-mi pisortaqatigiit assortunngilaat, tikkuarluguli oqaatigalugu pisumi matuma-ni A-p "pissutsinik isornarsinnaasunik ilusilersorluagaasumik tikkuaanera" pineqanngitsoq. Oqaaseqaat tamatuma saniatigut mitallerpalaartuuvog quiassuarpalaartuullunilu, tassa nunami taaguutit taakku nalinginnaasuunngiffianni, taamaattumillu oqariartuutaasog alla-mut sangusoorinneqarsinnaalluni. Taamaallitutik pisortaqatigit aamma tamanna pissuti-galugu naliliipput A-p oqaaseqaatai pissutissaqanngitsumik kusanaatsutut saqqummertut.

Siunnersorti, nuna tamakkerlugu qitisusumik Namminersorlutik Oqartussani NVL-imi ata-qatigiissaarisog Cand. Mag. Kistâra Motzfeldt Vahl qallunaat kalaallilu quianartunik assi-giinngitsumik paasinnittaaseqarnerat allaaserisamini "Overgangsvejledning"-ingimik qule-qutsikkamini Kalaallit Nunaanni Danmarkimilu ilinniartut siunnersortaannut saqqummius-sivog:

"Kalaaliulluni Danmarkimut tikikkaanni quiasaariaaseq allaanerusog tikinneqartarpoq. Qallunaat quiasaariaasianni tusangiasaarineq mitakujunnerlu akuusorujussuupput. Kalaallit ilaannut paatsoornarsinnaasarpog, soorlu aamma kalaallit illarumatunerujus-suat qallunaat ilaannut aamma paatsoortitsisartog. Taamaattumik quiasaariatsit assi-giinngissuseqarnerat maluginiagassaasarpog, taamaannerani aamma illua'tungerisap quiasaariaasiata qanog issusia paasiniaatigalugu." **Ilanngussaq 12** takoqqiguk.

Apeqquut 3.5

Apeqquut pillugu: A-p oqaaseqaatai suleqatigiinnermi ajornartorsiu-tissaqalersitsisimappata allatigulluunniit malitseqarsimappata Kommuneqarfik Sermersooq qinnuigineqarpoq tamanna pillugu nassuiaateqaqqullugu.

Akissut: Immikkoortumi 3.2-mi akissut innersuussutigaarput.

Apeqquut 3.6:

Apeqquut pillugu: Kommuneqarfik Sermersuulli suliamik suliarinninnerani suliner-mi sulinerullu avataani atorfirmut naapertuuttumik ataqqinassuseqarnissamik tatiginassuseqar-nissamillu piumasaqaat qanog sunniuteqarsimanersog suliap uannut paasissutissartaler-

sorneqarsimanerani uannut erseqqarluppoq, taamaattumillu kommuni qinnuigaara taman-
na pillugu nassuiaateqaqqullugu.

Akissut:

Immikkoortumi 3.2-mi akissut innersuussutigaarput.

Apeqqut 3.7:

Apeqqut pillugu: Pissutsit allat, matumani ilitsersuummi taaneqartut – soorlu pisortani atorfeqartitaasut namminneq suliaasaqarfimmik iluanni pissutsit pingaaruteqartut pillugit paasissutissanik eqqunngitsunik saqqummiusseqqussaanninnerat – ilanngullugit eqqar-saatigalugit, Kommuneqarfik Sermersuup suliamik suliarinninneranut sunniuteqarsimap-pata kommuni qinnuigaara tamanna pillugu nassuiaateqaqqullugu.

Akissut:

Oqaaseqaat suliaasaqarfimmi aalajangiiniarnerit ingerlaneranut toqqaannartumik attuu-massuteqaqqanngikkaluartoq A-p suliaasaqarfiani allaaserinninneq innersuussutigineqarpoq, taannalu immikkoortumi 3.2-mi allaaserineqartutut atuarfiit pisortaannut avataanilu sule-qatigisartakkanut toqqaannartumik attuumassuteqarpoq.

[...]

Allakkanut ilanngussat:

Ilanngussaq 1: 1.1.2017-imi inuttussutsimik naatsorsueqqissaarneq

Ilanngussaq 2: KNR-imi 30.8.2016-imi allaaserisaq, A-llu oqaaseqaataa

Ilanngussaq 3: Kommuneqarfik Sermersuumi Facebookimi allanilu inuit attaveqaqatigiit-tarfiini atuineramik ingerlatseriaaseq.

Ilanngussaq 4: Sulisoqarnermi inatsisilerituup sulisoqarnermi siunnersortimut 7.9.2016-i-mi e-mailia

Ilanngussaq 5: A pillugu atorfinitsitsinermi allakkat marluk

Ilanngussaq 6: A-p Meeqqanut, Ilaqutariinnut Atuarfeqarfimmullu Ataatsimiititaliamut 6.3.2014-imi suliamik saqqummiussinera

Ilanngussaq 7: A-mit skoleinspektørinut tamanut 1.9.2014-imi e-mailerutigisaq

Ilanngussaq 8: KNR-imi allaaserisaq 23.2.2012-imi ullulernerqarsimasoq

Ilanngussaq 9: Illoqarfiit pingaarnersaata pilersaarusiorneqarnera juni 2016-imeersoq

Ilanngussaq 10: Kommuneqarfik Sermersuumi atuarfinnut siunnersortit atorfiinik sulias-saannillu allaaserinninnerit

Ilanngussaq 11: "Sociale medier i ansættelsesretten"-ip 2012-imi naqeqqaarnera atuak-kallu ungalua saqqaalu, Kia Dollerschell qupperneq 42

Ilanngussaq 12: "Overgangsvejledning" Kalaallit Nunaanni Danmarkimilu ilinniartunut aq-qutissiusunut november 2018-imi Cand. Mag Kistâra Motzfeldt Vahlip, Namminersorlutik Oqartussani nuna tamakkerlugu Aqqutissiuusumit NVL ataqatigiissaarisumit allanneqartoq

Ilanngussaq 13: København Kommunip intranetsianit naqitanngortitaq

Ilanngussaq 14: Kommuneqarfik Sermersuup ammasuunermik ingerlatseriaasia 2015-i-meersoq

Ilanngussaq 15: Kommuneqarfik Sermersuup tusagassiuutit eqqarsaatigalugit periaasiani kiffaanngissuseqarluni oqaaseqaateqarsinnaatitaaneq nipangiussisussaataitanerlu pillugit intranetsimit naqitanngortitaq

Ilanngussaq 16: Kommuneqarfik Sermersuup tusagassiuutit eqqarsaatigalugit periaasia 2011-imeersoq

Ilanngussaq 17: Pisortani pissuserissuunermit, 2007-imeersumit tigulaagaq". (Atorfe-qarfimmi nutsigaavoq)

Kommuneqarfik Sermersuup ilanngussat takuneqarsinnaasutut arlalissuit nassiuppai. Ilanngussap 4-p kisimi ilanngunneqarnissaa soqutiginaateqartut isigaara. Ilanngussamit tassanga erserpoq Kommuneqarfik Sermersuup sulisoqarnermi inatsisilerituaa kommunimi sulisoqarnermut immikkoortorta-qarfimmi siunnersortimut e-mailimi 7. september 2016-imi ilaatigut imatut allattoq:

"[...]

A-p oqaaseqaataa massakkut takoreerpara, imatullu allappoq:

"Man henfalder i mild undren over visdommen i, at man vælger at fremvise en af landets ældste og lavest scorende folkeskoler for den danske undervisningsminister? Er der tale om et departementalt freudiansk slip og underbevist ønske om, få Danmark til at tage uddannelsesområdet tilbage af humanitære årsager."

"Nunami maani atuarfiit pisoqaanersaasa angusakinnerpaaffiusartullu ilaata Danmarkimi atuartitsinermut ministerimut takutissorneqartussatut toqqarneqarnerata silatorpa-laassusia tupigilaanngitsuugassaangila?

Naalakkersuisoqarfiup "freudiansk slip"-enera pissutigalugu ilinniartitsinermut tunngasut Danmarkimut uterteqqinneqarnissaannik sianiginngisamik kissaateqarneq pineqarpa?

[...]"

Erseqqissarneqassaaq oqaatigisaa paasissutissatut isertuunneqarnissaa piumasagaataanngitsoq, taakkuami nunami maani nutaarsiassaqaqarfinni assigiinngitsuneereersimmammata soorlu aviisini, KNR-imi Nuuk TV-milu, tassalu ASK nunami maani atuarfinnit tamanit angusakinnerpaaffiusartooq. Tamanna nalunaarusiami eqqaamasinnaasattut 2014-imi oktoberimi? saqqummertumi takuneqarsinnaavoq. Taamaattumik A-p nipangiussisussaaitaani unioqutissimangilaa. Assortuussutigineqarsinnaavorli tjenestemanditut suliffimmi sulliffiullu avataani atorfimmu naapertuuttumik ataqinassuseqarnissamik tatiginassuseqarnissamillu piumasagaammik sumiginnaasimanersoq, tak. tjenestemandit pillugit inatsimmi § 12:

“§ 10. Malittarisassat atorfimmu atuuttut tjenestemandip peqqusersuilluni malissavai, kiisalu atorfimmu naapertuuttumik ataqinassuseqarnissamik tatigineqarnissamillu piumasagaataasunik eqqortitsisinaanini sulinermini sulinermilu avataani takutissalugit.”

KS-imi [Kommuneqarfik Sermersuumi, uanga ilanngussara] facebookimi atuneq pillugu ingerlatseriaatsimi immikkoortumi 3-mi Facebookimi oqaaseqaateqarneq pillugu imaattunik allassimasoqarpoq:

“Suliffiit pillugu qanoq allannerit isumaliutersuutigeqqissaaruk – sulisutut imaluunniit inuinnartut allakkaangavit.

Tunaartarisassatsialak: Facebookikkut tamanut saqqummiussineq atuartartut allagaanik allannertut ippoq – allatatit illit ikinngutinnuinnarluunniit ingerlatikkaluarukkit. Atuartup qanoq inissisimallutit oqaaseqaateqarnerit takujuminaatsissinnaavaa, suliffinnullu sinniisutut oqaaseqaateqartutut imaaliallaannaq isigineqarsinnaallutit.”

Inuinnartut oqaaseqaateqarnerluni oqaatiginngilaa, tamatumalu saniatigut KS-mi MIA-mik ingerlatsivimmi atorfeqartitaanini aamma oqaatiginngilaa, linki una takuuk:

[https://www.facebook.com/\[...\]/about](https://www.facebook.com/[...]/about)

Qanoq ilinniagaqarnini atorfeqarniniluunniit facebookimi oqaatigisimangippagu paasissutissallu taakku tamanit pissarsiarineqarsinnaasuunngippata isumaqartoqarsinnaavoq inuinnartut oqaaseqaateqartoq, facebookikkullu inuinnartut saqqummertoq. Paarlattua atuussimassagaluarpoq sumi atorfeqarnera tamanit takuneqarsinnaasimagaluarpat. Taamaattorli oqaaseqaateqarnera illuinnaasiortutut pitsaanngitsutullu isigineqarsinnaasoq pisoratigiinnit assuarineqarsinnaavoq, oqaaseqaateqarnerami nammineq suliassaqaqarfiannut tunngasorpiaammat, tassanilu ajornartorsiulerumangikkuni mianersorluinnartariaqarpoq amanullu ammasumik oqallinnermi torersumik nipeqartariaqarluni.

Ilimagisaariaqarpoq inuit ikittunnguaannaat suliffitsik MIA-millu ingerlatsivimmut attaveqarnermikkut pineqartup MIA-ni siunnersortitut atorfeqarneranik ilisimasaqassasut. Oqaa-

seqaatai kikkunnilluunniit atuarneqarsinnaapput, taamaattorli "iluaraara"-mik nalunaarluni akineqarsimangilaq, akioriittullumi ikittuinnaapput, taassumami saniatigut marluinnaamata, taamaattumillu oqaaseqaammik soqutiginnineq annikitsuaraannaalluni. Oqaaseqaat KNR-ip atuartartuinit soqutiginneqanngikkaluaqaluni tamanit internetsimut aamma www.KNR.gl-imut isersinnaasunit atuarneqarsinnaavoq.

"Naalackersuisoqarfiup "freudiansk slip"-erneru pissutigalugu ilinniartitsinermut tunngasut Danmarkimut uterteqqinneqarnissaannik sianiginngisamik kissaateqarneq"-mik oqarneq illuinnaasiortumik oqaaseqaateqarneruvoq, uangalu paasinninnera unaavoq illuinnaasiortumik oqaaseqaateqarnermini "Kalaallit Nunaanni aningaasaqarnik-kut pissutsit ajortut" isummerfigigai, taamatullumi isumaqarnissaminut pisinnaatitaavoq, tassami oqaaseqaatip tigussaasutigut imarisai nipangiussisussaataitaneramik unioqquitsisuunngimmata. Ataatsimullu naammattumik isiginnissuseqarpoq tunngavissaqanngitsumik pasilliilluni ajuallatsisiniutitut isigineqannginnissaminut. Pisuni taamaattumi atorfeqartitaasup kiffaanngissuseqarluni oqaaseqaateqarsinnaatitaanera sulisitsisup oqaaseqaat pissutigalugu pineqaatissiinermigut innarlerniassanngilaa, tamanna pillugu annertunerusut pillugit KS intranet takuuk:

Pisortani atorfeqartitaasutut erseqqissumik inuinnartut oqaaseqaateqaraanni innuttaasut sinnerinut atuuttut saniatigut killilersuutit ikittuinnaat atuupput. Killilersuutit makku pisortani atorfeqartitaasunut immikkut atuupput:

"Pisortani atorfeqartitaasutut inuinnartut erseqqissumik oqaaseqaateqarnermi innuttaasunut allanut atuuttut saniatigut killilersuutit ikittuinnaat atuupput. Pisortani atorfeqartitaasut eqqarsaatigalugit immikkut killilersuutit makku atuupput:

- Paasissutissat nipangiusimaneqartussat pillugit oqaaseqaateqaqqusaannginneq.
- Kusanaappallaamik periaaseqaqqusaannginneq.
- Nammineq suliassaqarfigisap iluani pissutsit pingaaruteqartut pillugit paasissutissanik eqqunngitsunik saqqummiusseqqusaannginneq.
- Aalajangiiniarnernut atatillugu pissutsit nammineq suliassaqarfigisamut tunngasut pillugit oqaaseqaateqarnissamut tunuarsimaartussaaneq, pingaartumik qitiusumik inis-sisimagaanni, kiisalu aalajangiisoqannginnerani."

Saqqummiussami tamanut ammasumi oqaaseqaatini mianersuuttariaqarpai, taamaattorli oqaaseqaateqaqqunagu pisortaqatigiit inertersinnaanngilaat, oqallinnermili tamanut ammasumi "kusanarnerusumik nipilimmik" oqaloqqullugu inassinnaallugu, pingaartumik oqaaseqaataani pineqartup nammineq suliassaqarfia pineqartunut ilaatinneqarpat.

[...]" (Atorfeqarfimmi nutsigaavoq)

Kommuneqarfik Sermersuup oqaaseqaataa eqqartussissuserisumut E-mut allakkatigut 19. april 2017-imeersutigut nassiuppara, qinnuigalugulu taanna pillugu oqaaseqaatissaqaruni oqaaseqaateqaqqullugu. E-p e-mailikkut 18. juni 2017-imeersukkut ilaatigut imatut akivaanga:

"A-p suliamut atatillugu assuarineqarnera

Ombudsmandip Kommuneqarfik Sermersuumut allagaanut 10. februar 2017-imeersunut aamma kommunip akissutaanut 7. april 2017-imeersunut atatillugu Inatsisartut Ombudsmandiata allagai 19. april 2017-imeersut tamatumunnga uiggiullugu G sinnerlugu matumuna uterfigissavakka. Piffissaq akissuteqarniarnermut atorneqartoq sivisooq aallaqqaasiutitut ajuusaarutigissavara.

A-p suliamut atatillugu assuarineqarnera pisortani atorfeqartitaasut kiffaanngissuseqarlutik oqaaseqarsinnaatitaanerat pillugu malittarisassanut naapertuuttusoq kommuni isumaqarnersoq Ombudsmandip Kommuneqarfik Sermersuumut 10. februar 2017-imi allakkamini kommuni oqaaseqaateqaqquaa.

Ombudsmandip apeqqutaanut 3-mut kommunip akissutai pillugit oqaaseqaatikka tulliuuttuni atuarneqarsinnaapput:

Apeqqut 3.1:

Sermitsiaq.ag-p nittartagaani A-p oqaaseqaataata Kommuneqarfik Sermersuup nammineq isumaatut atuartartunit suna tunngavigalugu paasineqarsinnaanneranik apeqqummut kommuni ilaatigut akivoq kommuni 23.000-ingajannik inoqartoq, taakkualu amerlanersaat imminnut ilisarimasut, A-lu tamatuma saniatigut avataani suleqatigisartagarpassuarnut attuumassuteqartoq.

Taanna pillugu oqaatigineqassaaq pisortani atorfeqartitaasut kiffaanngissuseqarlutik oqaaseqaateqarsinnaatitaanerat pillugu malittarisassat ataatsimut atuuttuummata taamalu kommunini mikinerni, kommunini anginerni naalagaaffimmilu atorfeqartitaasunik assigiinngisitsinani. Malittarisassat taakkuusut pisortat suliffeqarfiutaannut tamanut atuupput – tassalu pisortani atorfeqartitaasut kiffaanngissuseqarlutik oqaaseqaateqarsinnaatitaanerminni atorfeqartitaanerminnut tunngasut pissutigalugit aallaavittut killilersugaanngitsut. Taamaattumik atortussaatinneqarpoq kommunip A-p atorfeqarfigisaata qanoq angitigissusia mikitigissusialuunniit apeqqutaanngitsoq.

Atorfeqartitaasut ataasiakkaat attuumassuteqarfigisaat eqqarsaatigalugit atortussaatinneqarpoq tamanna kommunip aalajangiinerinut sulianut tunngasutigut aamma sunniuteqarsinnaanngitsoq. Aamma oqaatigineqassaaq kommuni suliama ilanngussami 4-mi nammineq al-

lakkamini A-p attuumassuteqarnera pillugu allatut isumaqartoq, tassami ilanngussami 4-imi ilaatigut imatut allattoqarmat:

"Ilimagisariaqarpoq inuit ikittuinnaat suliffitsik aqutigalugu aamma MIA-mik ingerlatsivik aqutigalugu attaveqarnerminni pineqartup MIA-mi siunnersortitut atorfeqarneranik ilisimasaqartuusut."

Atortussaatinneqarpoq A oqaaseqaammimi atorfimminut tunngasunik, matumani Kommuneqarfik Sermersuumi atorfeqarni ilanngullugu eqqarsaatigalugu, taasaqarsimannginnami inuinnartut oqaaseqaateqarnera erseqqilluinnartoq, taamaaliornissaminullu Tunngaviusumik Inatsisikkut illersugaasoq, tak. Tunngaviusumik inatsimmi § 77.

Tamanna kommunip aamma paasinninnerigaa ilimanarpoq, suliamimi ilanngussami 4-mi ilaatigut imatut allattoqarmat:

"Facebookimi saqqummerfimmini ilinniakkami atorfimmiluunniit suussusianik taasaqarsimanngimmat, paasissutissallu taakku tamanit pissarsiarineqarsinnaasuunngimmata ilinniagaq atorfillu pillugit paasissutissiinnginnera aallaavigalugu isumaqartoqarsinnaavoq inuinnartut oqaaseqaateqartoq Facebookinilu inuinnartut ingerlakkaa. ..."

Eqqortussaq anguniarlugu oqaatigineqassaaq A-p Kommuneqarfik Sermersuumi pisortat ilaattut atorfeqartitaannginnerata, Kommuneqarfik Sermersuulli oqaatigisaatut pisortaqtigiinnut sammititaasumik siunnersortitut suliassaqaarnerata pissusiviusut allanngortinngikkai.

Apeqqut 3.2

A pissutsini oqaaseqaammimi pineqartuni aalajangiiniarnernut peqataasimanersoq apeqqut pillugu oqaatigineqassaaq kommunip nammineq oqaatigigaa taamaanngitsoq, tassami allasarisami pineqartumi suut tamarmik Namminersorlutik Oqartussat pisinnaatitaaffeqarfiannut tunngammata.

Kommuneqarfik Sermersooq akissummini taamaakkaluartoq tamanna A-p pisinnaatitaaneranut tunngasutut sooq isigisariaqarnera pillugu takisuuliorluni nassuiaateqarpoq. Oqaaseqaatit taakku Ombudsmandip apeqqutaa eqqarsaatigalugu sunniuteqanngillat, Ombudsmandillu aalajangiinerani pingaartillugit isiginiarneqarsinnaanatik.

Apeqqut 3.3

Pisuni sorlarni isornartorsiutit kommunip iluani saqqummiuteqqaarneqartarnissaat kommunip piunasaqaatigineraa apeqqummi ataatsimut malittarisassat kisiisa innersuussutigalugit Kommuneqarfik Sermersooq akivoq, G-llu tungaanit atortussaatinneqarpoq Ombudsmandip apeqqutaa kommunip erseqqissumik isummerfiginngikkaa, kommunillu akissutaa aamma imatut paasineqarsinnaasoq isornartorsiutit kommunip iluani saqqummiunneqaqqaartarnissaat piunasaqaataanngitsoq, kommunilli iluani attaveqatigiinneq assut pingaartillugu isiginiarneqar-

toq (tamanna qanoq paasineqassagami?). Paasinninnermilli nassuiaaneq kingulleq suliamut atatillugu assuarinninnermut assortuuttuuvog, tassami erseqqissumik oqaatigineqarmat isornartorsiuneq kommunip iluani saqqummiunneqarsimasariaqaraluartoq.

Atortussaatinneqarpoq apeqqut erseqqissumik isummerfigeqqullugu kommuni piumaffigineqassasoq, matumani kommuni ilanngullugu piumaffigineqassalluni manna isummerfigeqqullugu, tassalu isornartorsiunerup avammut saqqummiunneqannginnerani kommunip iluani saqqummiuteqqaarneqartarnissaa piumasaqaataanersoq, taamaangippallu kommuni piumaffigineqassalluni manna akeqqullugu, tassalu tamanna A-p suliamut atatillugu assuarineqarnerani oqaatigineqarsimanersoq.

Pisortani atorfeqartitaasut isornartorsiummik avammut saqqummiussinnginnerminni pisortani ingerlatsiviup iluani saqqummiusseqqaartarnissaannik piumasaqaammut inatsisikkut tunngavigisaq eqqarsaatigalugu atortussaatinneqarpoq taamaaliornissamut inatsisikkut tunngavisaqanngitsoq, Kommuneqarfik Sermersuullu akissutitut allakkamini tamatumunnga inatsiseqartitsinikkut tunngavissaqarnera uppersarsimangikkaa.

Apeqqut 3.4

Kommuni Ombudsmandimit qinnuigineqarpoq A-p oqaaseqaataa pissutissaqanngitsumik kusanaatsumik oqaasertaqartoq kommuni isumaqarnerasoq nassuiaqqullugu. Kommunip apeqqut taanna pillugu oqaatigaa, soorlu tamanna G-p taamatut paasigaa, oqaaseqaateqarnerup mitallerpalaartuunerata quiassuarpalaartuuneratalu immini oqaaseqaatit kusanaatsumik oqaasertaqarnerat nassatarigaa.

Kommunip sulisumi tamanut ammasumik inuinnartullu mitallernermik quiassuarnermillu atuinissaannik ataatsimut inerteqquteqarsinnaatitaanera Ombudsmandip akuersaarniannikkuniuk Kommuneqarfik Sermersuup pisumik taassuminnga inatsiseqartitsinikkut naliliinera isornartorsiortariaqarpaa.

Oqaatigineqassaaq kommunip nammineq allakkamini imarisaa ilusialu pillugit ilanngussami 4-mi nammineq manna oqaatigigaa:

""Naalakkersuisoqarfiup "freudiansk slip"-ernera pissutigalugu ilinniartitsinnermut tunngasut Danmarkimut uterteqqinneqarnissaannik sianiginngisamik kissaateqarneq"-mik oqarneq namminissarsiorluni oqarneruvoq, uangalu paasinninnera unaavoq oqaaseqaat taanna illuinnaasiortuusoq, tassanilu "Kalaallit Nunaanni aningaasaqarnikkut pissutsit ajortut" isummerfigigai, taamatullumi isumaqarnissaminut pisinnaatitaavoq, tassami oqaaseqaatit tigussaasutigut imarisai nipangiussisussaataitanerani unioqqutitsisuunngimmata. Ataatsimullu naammattumik isiginnissuseqarpoq tunngavissaqanngitsumik pasilliilluni ajullatitsiniutitut isigineqannginnissaminut. Pisuni taamaattumi atorfeqartitaasup kiffaangissuseqarluni oqaaseqaateqarsinnaatitaanera sulisitsisup oqaaseqaat pissutigalugu pineqaatitsinermigut innarlerniassanngilaa. ..."

Atortussaatinneqarpoq A-p oqaaseqaataa pissutissaqanngitsumik kusanaatsumik oqaasertal-
lerneqarsimanngitsoq.

Apeqqu 3.5

G-p naliliinera unaavoq A-p oqaaseqaataata nassatarisaanik Kommuneqarfik Sermersuup ilu-
ani imaluunniit kommunip avataani suleqatigisartakkat eqqarsaatigalugit suleqatigiinnermi
erseqqissumik ajornartorsiuteqalersimanersoq Kommuneqarfik Sermersuup nassuiangikkaa.

Atortussaatinneqarpoq oqaaseqaataasimasinnaasup kingunerisaanik ajornartorsiutit tigusaanngitsut erseqqissarneqanngitsullu suliamut atatillugu assuarinninnermik nassataqarsinnaanngitsut.

Apeqqu 3.6

Suliffimmi suliffiullu avataani atorfirmut naapertuuttumik ataqqinassuseqarnissamik tatiginassuseqarnissamillu piumasaqaat eqqarsaatigalugu atortussaatinneqarpoq A, pingaartumik Tunngaviusumik Inatsimmi § 77 isiginiarlugu, atorfeqartitaanermi suliffimmi suliffiullu avataani ataqqinassuseqarnissamik tatiginassuseqarnissamillu piumasaqaat unioqqutillugu iliuuseqarsimanngitsoq.

Apeqqu 3.7

Ombudsmandip apeqquummik oqaasertalersuinera kommunillu tassunga akissutaa tunngavigalugit tunngaviutittariaqarpoq kommuni naliliisoq A oqaaseqaateqarnermini eqqunngitsunik saqqummiussisimanngitsoq.

G A-mut sinniisuusoq sinnerlugu ataatsimut atortussaatinneqarpoq A-p suliamut atatillugu assuarineqarnissaanut suliamut attuumassuteqartumik tunngavissaqarsimanngitsoq.” (Atorfeqarfimmi nutsigaavoq)